



柳田文庫
文庫11
D 303
38



文庫11
D303
38

柳田泉文庫

48-11000

010190568437

明史卷一百六十八

列傳第五十六

總裁官總理事務 經筵講官少保兼李太保保和殿大學士兼禮部尚書事加級張廷玉等奉

救修

陳循 蕭 鎡

王文

江淵

許彬

陳文

萬安

彭華

劉翊 子 銳

劉吉

尹直

陳循字德遵泰和人永樂十三年進士第一授翰林修撰習朝廷典故帝幸北京命取秘閣書詣行在遂留侍

明史卷一百六十八

列傳

一



馬洪熙元年進侍講宣德初受命直南宮日承顧問賜第玉河橋西巡幸未嘗不從進侍講學士正統元年兼經筵官久之進翰林院學士九年入文淵閣典機務初廷議天下吏民建言章奏皆三楊主之至是榮士奇已卒循及曹鼐馬愉在內閣禮部援故事請帝以楊溥老宜優閒令循等預議明年進戶部右侍郎兼學士土木之變人心洶懼循居中所言多採納進戶部尚書兼職如故也先犯京師請敕各邊精騎人衛馳檄回番以疑敵帝皆從其計景泰二年以葬妻與鄉人爭墓地爲前後巡按御史所不直循輒訐奏給事中林聰等極論循

罪帝是聰言而置循不問循本以才望顯及是素譽驟焉二年十二月進少保兼文淵閣大學士帝欲易太子內畏諸閣臣先期賜循及高穀白金百兩江淵王一寧蕭鎡半之比下詔議循等遂不敢諍加兼太子太傅尋以太子令旨賜百官銀帛踰月帝復賜循等六人黃金五十兩進華蓋殿大學士兼文淵閣如故循子英及王文子倫應順天鄉試被黜相與構考官劉儼黃諫爲給事中張寧等所劾帝亦不罪英宗復位于謙王文死杖循百戍鐵嶺衛循在宣德時御史張楷獻詩忤旨循曰彼亦忠愛也遂得釋御史陳祚上疏觸帝怒循婉爲解

得不死景帝朝嘗集古帝王行事名勤政要典上之河
南江北大雪麥苗死請發帑市麥種給貧民因事進言
多足採者然久居政地刻躁爲士論所薄其嚴譴則石
亨輩爲之非帝意也亨等旣敗循自貶所上書自訟言
天位陛下所固有當天與人歸之時羣臣備法駕大樂
恭詣南內奏請臨朝非特宮禁不驚抑亦可示天下萬
世而亨等傲倖一時計不出此卒皆自取禍敗臣服事
累葉曾著微勞實爲所擠惟陛下憐察詔釋爲民一年
卒成化中于謙事雪循子引例請卹乃復官賜祭同邑
蕭鎡字孟勤宣德二年進士需次於家八年帝命楊溥

合選三科進士拔二十八人爲庶吉士鎡爲首英宗卽
位授編修正統三年進侍讀久之代李時勉爲國子監
祭酒景泰元年以老疾辭乞得允監丞鮑相率六館生
連章乞留帝可其奏明年以本官兼翰林學士與侍郎
王一寧竝入直文淵閣又明年進戶部右侍郎兼官如
故易儲議起鎡曰無易樹于霸者所禁矧天朝乎不聽
加太子少師寰宇通志成進戶部尚書帝不豫諸臣議
復憲宗東宮李賢私問鎡鎡曰旣退不可再也英宗復
位遂削籍天順八年卒成化中復官賜祭鎡學問該博
文章爾雅然性猜忌遇事多退避云

王文字千之初名強東鹿人永樂十九年進士授監察御史持廉奉法爲都御史顧佐所稱宣德末奉命治彰德妖賊張普祥獄還奏稱旨賜今名英宗卽位遷陝西按察使遭父憂命奔喪起視事正統三年正月擢右副都御史巡撫寧夏五年召爲大理寺卿明年與刑部侍郎何文淵錄在京刑獄尋遷右都御史九年出視延綏寧夏邊務劾治定邊營失律都督僉事王禎都督同知黃真等罪邊徼爲肅明年代陳鎰鎮守陝西平涼臨洮鞏昌饑奏免其租尋遷左都御史在陝五年鎮靜不擾景泰改元召掌院事文爲人深刻有城府面目嚴冷與

陳鎰同官一揖外未嘗接談諸御史畏之若神廷臣無敢干以私者然中實柔媚初按大理少卿薛瑄獄希王振指欲坐瑄死至是治中官金英縱家奴不法事但抵奴罪給事中林聰等劾文鎰畏勢長奸下詔獄二人俱伏乃宥之二年六月學士江淵上言法司斷獄多枉文及刑部尚書俞士悅求罷且言淵嘗私以事不聽故見誣帝兩置之三年春加太子太保時陳鎰鎮陝西將還文當代諸御史交章留之乃改命侍郎耿九疇南京地震江淮北大水命巡視偕南九卿議上軍民便宜九事又言徐淮間饑甚而南京儲蓄有餘請盡發徐淮倉粟

振貸而以應輸南京者輸徐淮補其缺皆報可是時陳循最任好剛自用高穀與循不相能以文彊悍思引與共政以敵之乃疏請增閣員循舉其鄉人薰維禎穀遂舉文而文得中官王誠助於是詔用文尋自江淮還朝改吏部尚書兼翰林院學士直文淵閣二品大臣入閣自文始尋遭母喪奪哀如前文雖爲穀所引而穀遲重循性明決文反與循合而不附穀其後以子倫故欲傾考官又用穀言而罷由是兩人卒不相得五年三月江淮大水復命巡視先是蘇松常鎮四府糧四石折白銀一兩民以爲便後戶部復改米令輸徐淮凡一百十餘

萬石率三石而致一石有破家者文用便宜停之又發原振饑民三百六十餘萬時年饑多盜文捕長洲盜許道師等二百人欲張其功坐以謀逆大理卿薛瑄辨其誣給事中王鎮乞會廷臣勘實得爲盜者十六人置之法而餘得釋還進少保兼東閣大學士再進謹身殿大學士仍兼東閣初英宗之還也廷臣議奉迎禮文時爲都御史厲聲曰公等謂上皇果還耶也先不索土地金帛而遽送駕來耶衆素畏文皆愕然不決而罷及易儲議起文率先承命景帝不豫羣臣欲乞還沂王東宮文曰安知上意誰屬乃疏請早選元良以是中外誼傳文

與中官王誠等謀召取襄世子英宗復位即日與王謙
執於班內言官劾文與謙等謀立外藩命鞠於廷文力
辯曰召親王須用金牌信符遣人必有馬牌內府兵部
可驗也辭氣激壯逮車駕主事沈敬按問無迹廷臣遂
坐謙文召敬謀未定與謙同斬於市諸子悉戍邊敬亦
坐知謀反故縱減死戍鐵嶺文之死人皆知其誣以素
刻忮且迎駕復儲之議不愜輿論故冤死而民不思成
化初赦其子還尋復官贈太保諡毅愍倫改名宗彝成
化初進士歷戶部郎中出理遼東餉中官汪直東征言
宗彝督餉勞擢太僕少卿弘治中累官南京禮部尚書

卒諡安簡

江淵字世用江津人宣德五年庶吉士授編修正統十
二年詔與杜寧裴綸劉儼商輅陳文楊鼎呂原劉俊玉
玉共十人肄業東閣曹鼐等爲之師郕王監國徐有貞
倡議南遷太監金英叱出之踉蹌過左掖門淵適入迎
問之有貞曰以吾議南遷不合也於是淵入極陳固守
之策遂見知於王由侍講超擢刑部右侍郎也先薄京
師命淵參都督孫鏜軍事景泰元年出視紫荆劄馬白
羊諸關隘與都指揮同知翁信督修雁門關其秋遂以
本官兼翰林學士入閣預機務尋改戶部侍郎兼職如

故明年六月以天變條上三事一厚結朶顏赤斤諸衛
爲東西藩籬一免京軍餘丁以資生業一禁訐告王振
餘官以免枉濫詔悉從之又明年二月改吏部仍兼學
士是春京師久雨雪淵上言漢劉向曰凡雨陰也雪又
雨之陰也仲春少陽用事而寒氣脅之占法謂人君刑
法暴濫之象陛下恩威溥洽未嘗不赦過宥罪竊恐有
司奉行無狀寬抑或有未伸且向者下明詔免景泰二
年田租之三今復移檄追徵則是朝廷自失大信於民
怨氣鬱結良由此也帝乃令法司申寬濫詰戶部違詔
下尚書金濂於獄卒免稅如詔東宮旣易加太子少師

四川巡撫僉都御史李匡不職以淵言罷之母憂起復
初侍講學士倪謙遭喪淵薦謙爲講官謙遂奪哀至是
御史周文言淵引謙正自爲今日地帝以事旣處分不
問而令自今羣臣遭喪無濫保五年春山東河南江北
饑命同平江侯陳豫往撫淵前後條上軍民便宜十數
事并請築淮安月城以護常盈倉廣徐州東城以護廣
運倉悉議行時江北游饑淮安糧運在塗者淵悉追還
備振漕卒乘機侵耗事聞遣御史按實淵被劾當削籍
廷臣以淵守便宜不當罪帝宥之閣臣旣不相協而陳
循王文尤刻私淵好議論每爲同官所抑意忽忽不樂

明史卷一百一十八 列傳 十一
會兵部尚書于謙以病在告詔推一人協理部事淵心欲得之循等佯推淵而密令商輅草奏示以石兵江工四字淵在旁不知也比詔下調工部尚書石璞於兵部而以淵代璞淵大失望英宗復位與陳循等俱謫戍遼東未幾卒初黃玠之奏易儲也或疑淵主之邱濬曰此易辨也廣西紙與京師紙異索奏視之果廣西紙其誣乃自成化初復官

許彬字道中寧陽人永樂十三年進士改庶吉士授檢討正統末累遷太常少卿兼翰林待詔提督四夷館上皇將還遣彬至宣府奉迎上皇命書罪已詔及諭羣臣

敕遣祭土木陣亡官軍以此受知上皇還擢本寺卿石亨等謀復上皇以其謀告彬彬進徐有貞語具有貞傳英宗復位進禮部左侍郎兼翰林院學士入直文淵閣未幾爲石亨所忌出爲南京禮部右侍郎甫行貶陝西叅政至則乞休去憲宗立命以侍郎致仕尋卒彬彬性坦率好交游不能擇人一時浮蕩士多出其門晚叅大政方欲杜門謝客而客惡其變態競相騰謗竟不安其位陳文字安簡廬陵人鄉試第一正統元年進士及第授編修十二年命進學東閣秩滿遷侍講景泰二年閣臣高穀薦文才遂擢雲南右布政使貴州比歲用兵資餉

雲南民困轉輸文令商賈代輸而民倍償其費皆稱便
稅課額鈔七十餘萬吏俸所取給典者侵蝕吏或累歲
不得俸文悉按治課日羨溢雲南產銀民間用銀貿易
視內地三倍隸在官者免役納銀亦三之納者不爲病
文曰雖如是得無傷廉乎損之復令減隸額三之一名
譽日起遷廣東左布政使母憂未赴英宗既復位一日
謂左右曰向侍朕編修誓而長者安在左右以文對卽
召爲詹事乞終制不允入侍東宮講讀學士呂原卒帝
問李賢誰可代者曰柯潛可出告王黼黼曰陳文以次
當及奈何抑之明日賢入見如黼言七年二月進禮部

右侍郎兼學士入內閣文既入數撓賢以自異曰
若所薦也侍讀學士錢溥與文比舍居交甚歡溥嘗擬
內侍書其徒多貴幸來謁必邀文共飲英宗大漸東宮
內侍王綸私詣溥計事不召文文密覘之綸言帝不豫
東宮納妃如何溥謂當奉遺詔行事已而英宗崩賢當
草詔文起奪其筆曰無庸已有草者因言綸溥定計欲
逐賢以溥代之而以兵部侍郎韓雍代尚書馬昂賢怒
發其事是時憲宗初立綸自謂當得司禮氣張甚英宗
大殮綸衰服襲貂帝見而惡之太監牛玉恐其軋已因
數綸罪逐之去溥謫知順德縣雍浙江叅政詞所連順

天府尹王福通政叅議趙昂南寧伯毛榮都督馬良馮宗劉聚錦衣都指揮僉事門達等皆坐謫雍亦文素所不悅者也改吏部左侍郎同知經筵事成化元年進禮部尚書羅倫論賢奪情文內媿陰助賢遂倫益爲時論所鄙三年春帝命戶部尚書馬昂副都御史林聰及給事中潘禮陳越清理京營文奏必得內臣共事始可剷除宿弊因薦太監懷恩帝從之英宗實錄成加太子少保兼文淵閣大學士四年卒贈少傅謚莊靖文素以才自許在外頗著績效士大夫多冀其進用及居宮端行事鄙猥既叅大政無所建明朝退則引賓客故人置酒

爲曲宴事務請屬性忤急遇睚眦怨必報及賢卒文益恣意行名節大喪歿後禮部主事陸淵之御史謝文祥皆疏論文不當得美謚帝以事已施行不許

萬安字循吉眉州人長身魁顏眉目如刻畫外寬而深中正統十二年進士改庶吉士授編修成化初屢遷禮部左侍郎五年命兼翰林學士入內閣叅機務同年生詹事李泰中官永昌養子也齒少於安安兄事之得其驩自爲同官每當遷必推安出已上至是議簡閣臣泰復推安曰子先之我不患不至故安得入閣而泰忽暴病死安無學術旣柄用惟日事請託結諸閹爲內援時

萬貴妃寵冠後宮安因內侍致殷勤自稱子姪行妃嘗
自媿無門閥聞則大喜妃弟錦衣指揮通遂以族屬數
過安家其妻王氏有母至自博興王謂母曰嚮家貧時
以妹爲人娣今安在母曰第憶爲四川萬編修者通心
疑是安訪之則安小婦由是兩家婦日往來通妻著籍
禁內恣出人安得備知宮中動靜益自固侍郎邢讓祭
酒陳鑑與安同年不相能安構獄除兩人名七年冬彗
見天田犯太微廷臣多言君臣否隔宜時召大臣議政
大學士彭時商輅力請司禮中官乃約以御殿日召對
且曰初見情未洽勿多言姑俟他日將入復約如初比

見時言天變可畏帝曰已知卿等宜盡心時又言昨御
史有疏請減京官俸薪武臣不免觐望乞如舊使帝可
之安遂頓首呼萬歲欲出時輅不得已皆叩頭退中官
戲朝士曰若輩嘗言不召見及見止知呼萬歲耳一時
傳笑謂之萬歲閣老帝自是不復召見大臣矣其後尹
直入閣欲請見帝計事安止之曰往彭公請召對一語
不合輒叩頭呼萬歲以此貽笑今吾輩每事盡言太監
擇而聞之上無不允者勝面對多矣其容悅不識大體
且善歸過於人如此九年進禮部尚書久之改戶部十
三年加太子少保俄改文淵閣大學士孝宗出閣進吏

部尚書謹身殿大學士尋加太子太保時彭時已歿商輅以忤汪直去在內閣者劉珣劉吉而安爲首輔與南人相黨附珣與尚書尹旻王越又以北人爲黨互相傾軋然珣疏淺而安深鷙故珣卒不能勝安十八年汪直寵衰言官請罷西廠帝不許安具疏再言之報可中外頗以是稱安文華大訓成進太子太傅華蓋殿大學士復進少傅太子太師再進少師當是時朝多秕政四方災傷日告帝崇信道教封金闕玉闕真君爲上帝遣安祭於靈濟宮而李孜省鄧常恩方進用安因彭華潛與結藉以排異已於是珣及王恕馬文升秦紘耿裕諸大

臣相繼被逐而華遂由詹事遷吏部侍郎入內閣朝臣無敢與安牴牾者華安福人大學士時之族弟舉景泰五年會試第一深刻多計數善陰伺人短與安孜省比嘗嗾蕭彥莊攻李秉又逐尹旻羅環人皆惡而畏之踰年得風疾去孝宗嗣位安草登極詔書禁言官假風聞挾私中外譁然御史楊鼎請閣安從容言曰此裏面意也彙卽以其語奏聞謂安抑塞言路歸過於君無人臣禮於是庶吉士鄒智御史文貴姜洪等交章列其罪狀先是歙人倪進賢者相知書無行譖事安日與講房中術安臆之因令就試得進士授爲庶吉士除御史帝一

日於宮中得疏一小篋則皆論房中術者未署曰臣安進帝命太監懷恩持至閣曰此大臣所爲耶安媿汗伏地不能出聲及諸臣彈章入復令恩就安讀之安數跪起求哀無去意恩直前摘其牙牌曰可出矣始惶遽索馬歸第乞休去時年已七十餘尚於道上望三台星冀復用居一年卒贈太師諡文康初孝穆皇太后之薨內庭籍籍指萬貫妃孝宗立魚臺縣丞徐頊上書發其事廷臣議逮鞠萬氏戚屬會出入宮掖者安驚懼不知所爲曰我久不與萬氏往來矣而劉吉先與萬氏姻亦自危其黨直尚在閣其擬旨寢之孝宗仁厚亦置不問

安吉得無事安在政府二十年每遇試必令其門生爲考官子孫甥壻多登第者子翼南京禮部侍郎孫弘璧翰林編修安死無幾翼弘璧相繼死安竟無後

劉珣字叔溫壽光人正統十三年進士改庶吉士授編修天順中歷右中允侍講東宮憲宗卽位以舊宮僚屢遷太常卿兼侍讀學士直經筵日講成化十年進吏部左侍郎充講官如故珣每進講反覆開導詞氣侃侃聞者爲悚學士劉定之稱爲講官第一憲宗亦愛重之明年詔以本官兼翰林學士入閣預機務帝每呼東劉先生賜印章一文曰嘉猷贊翊尋進吏部尚書再加太子

少保文淵閣大學士文華大誦成加太子太保進謹身
殿大學士珣性疎直自以宮寮舊臣遇事無所回護員
外郎林俊以劾梁芳繼曉下獄珣於帝前解之李孜省
輩左道亂政欲動搖東宮珣密疏諫謀少阻素薄萬安
嘗斥安負國無恥安積忿日夜思中珣初商輅之劾汪
直也珣與萬安劉吉助之爭得罷西廠他日珣又折王
越於朝越慚而退已而西廠復設珣不能有所諍至十
八年安見直寵衰揣知西廠當罷邀珣同奏珣辭不與
安遂獨奏疏上帝頗訝無珣名安陰使人訐珣與直有
連會珣子鑑邀妓狎飲里人趙賓戲爲劉公子曲或增

飾穢語雜教坊院本奏之帝大怒決意去珣遣中官賈
昌召安吉赴西角門出帝手封書一函示之安等佯驚
救次日珣具疏乞休令馳驛賜月廩歲縹白金倍幣甚
厚其實排珣使去者安吉兩人謀也時內閣三人安貪
狡吉陰刻珣稍優顧喜譚論人目爲狂躁珣旣倉卒引
退而彭華尹直相繼入內閣安吉之黨乃益固珣初遭
母憂廬墓三年比歸侍父盡孝父歿復廬於墓弘治三
年卒諡文和嘉靖初以言官請賜祠額曰昭賢仍遣官
祭之子欽字汝中八歲時憲宗召見愛其聰敏且拜起
如禮卽命爲中書舍人宮殿門闕高同官楊一清常提

明史卷一百一十八 列傳 五十四
之出入帝慮牙牌易損命易以銀歷官五十餘年嘉靖
中至太常卿兼五經博士仍供事內閣誥敕房博學有
行誼與長洲劉棻竝淹貫故實時稱二劉

劉吉字祐之博野人正統十三年進士改庶吉士授編
修充經筵官寰宇通志成進修撰天順四年侍講讀於
東宮以憂歸憲宗卽位召纂英宗實錄至京上疏乞終
制不允進侍讀實錄成遷侍讀學士直經筵累遷禮部
左侍郎成化十一年與劉瑯同受命兼翰林學士入閣
預機務尋進禮部尚書孝宗出閣加太子少保兼文淵
閣大學士十八年遭父喪詔起復吉三疏懇辭而陰屬

貴戚萬喜爲之地得不允文華大訓成加太子太保
武英殿大學士久之進戶部尚書謹身殿大學士尋
少保兼太子太傅孝宗卽位庶吉士鄒智御史姜洪劾
訊萬安尹直及吉皆小人當斥吉深銜之安直皆去吉
獨留委寄愈專慮言者攻不已乃建議超遷科道官處
以不次之位詔起廢滯給事中賀欽御史強珍輩十八
已次第擬擢吉復上疏薦之部曹預薦者惟林俊一人
冀以此籠絡言路而言者益未息庶子張昇御史曹璘
歐陽旦南京給事中方向御史陳嵩等相繼劾吉吉憤
甚中昇逐之數興大獄智向囚繫遠貶洪亦謫官復與

中官蔣琮比逐南御史姜紹等臺署爲空中外側日言者亦少袁初吉與萬安劉琦在成化時帝失德無所規正時有紙糊三閣老泥塑六尚書之謠至是見孝宗仁明同列徐溥劉健皆正人而吉於閣臣居首兩人有論建吉亦署名復時時爲正論竊美名以自蓋弘治二年二月旱帝令儒臣撰文禱雨吉等言邇者奸徒襲李孜省鄧常恩故術見月宿在畢天將陰雨遂奏請祈禱覲一驗以希進用偉門一開爭言祈禱要寵召禍實基於此祝文不敢奉詔帝意悟遂已之五月以災異請帝修德防微慎終如始八月又以災異陳七事代王獻海青

吉等言登極詔書已却四方貢獻乞勿受明年二月偕同列上言陛下聖質清羸與先帝不同凡宴樂游觀一切嗜好之事宜悉減省左右近臣有請如先帝故事者當以太祖太宗典故斥退之祖宗令節宴游皆有時陛下法祖宗可也土魯番使者貢獅子還帝令內閣草敕遣中官送之吉等言不宜優寵太過使番戎輕中國爭遂寢旣又言獅子諸獸日飼二羊歲當用七百二十又守視校尉日五十人皆繁費宜絕諸獸食聽自斃帝不能用十一月星變又言邇者妖星出天津歷杵臼迫營室其占爲兵爲饑爲水旱今雨畿河南山西陝西旱蝗

四川湖廣歲不登倘明年復然恐盜賊竊發禍亂將作願陛下節用度罷宴游屏詭言斥異教留懷經史講求治道沙河修橋江西造瓷器南海子繕垣牆俱非急務宜悉停止帝嘉納之帝惑近習言頗崇祈禱事發經牌令閣臣作贊又令擬神將封號吉等極言邪說當斥吉自帝初卽位進少傅兼太子太師吏部尚書及憲宗實錄成又進少師華蓋殿大學士吉柄政久權勢烜赫帝初傾心聽信後眷頗衰而吉終無去志五年帝欲封后弟伯爵命吉撰誥券吉言必盡封二太后家子弟方可帝不悅遣中官至其家諷令致仕始上章引退詔賜敕

馳驛如故事吉多智數善言會自緣飾銳於營私時爲言路所攻居內閣十八年人目之爲劉繇花以其耐彈也吉疑其言出下第舉子因請舉人三試不第者不得復會試時適當會試期舉子已羣集都下禮部爲請詔姑許入試後如令已而吉罷令亦不行吉歸踰年卒贈太師諡文穆

尹直字正言泰和人景泰五年進士改庶吉士授編修成化初充經筵講官與修英宗實錄總裁欲革去景泰帝號引漢昌邑更始爲比直辨曰實錄中有初爲大臣後爲軍民者方居官時則稱某官某旣罷去而後改稱

如漢府以謀逆降庶人其未反時書王書叔如故也豈有逆計其反而卽降從庶人之號者哉且昌邑旋立旋廢景泰帝則爲宗廟社稷主七年更始無所受命景泰帝則策命於母后當時定傾危難之中微帝則京師非國家有雖易儲失德然能不惑於盧忠徐振之言卒全兩宮以至今日其功過足相準不宜去帝號時不能難旣成進侍讀歷侍讀學士六年上疏乞纂修大明通典并續成宋元綱目章下所司十一年遷禮部右侍郎辭不許丁父憂服除起南京吏部右侍郎就改禮部左侍郎二十二年春召佐兵部占城王古來爲安南所逼棄

國來求援議者欲送之還直曰彼窮來歸我若驅使還國是殺之也宜遣大臣卽詢量宜處置詔從之命都御史屠濬往貴州鎮巡官奏苗反請發兵廷議將從之直言起釁邀功不可信命官往勘果無警是年九月改戶部兼翰林學士入內閣踰月進兵部尚書加太子太保直明敏博學練習朝章而躁於進取性矜忌不自檢飭與吏部尚書尹旻相惡直初覲禮部侍郎而旻薦他人直以中旨得之次日遇旻於朝舉笏謝旻曰公所謂簡在帝心者自是怨益深後在南部八年鬱鬱不得志屬其黨萬安彭華謀內召旻輒持不可諸朝臣亦皆畏直

明史卷一百六十八 列傳 七
幸其在南及推兵部左右侍郎吏部列何琮等八人詔
用琮而直以安華及李孜省力中旨召還至是修怨與
孜省等比陷旻父子得罪又構罷江西巡撫閔珪物論
喧然不平刑部郎袁清者安私人又幸於內侍郭閏勸
事浙江較轆諸大吏吏部尚書李裕惡之比還卽除紹
興知府清懼累章求改裕極論其罪下詔獄安閏以屬
直爲言於孜省取中旨赦之改知鄖陽孝宗立進士李
文祥御史湯鼐姜洪繆樛庶吉士鄒智等連章劾直給
事中宋琮及御史許斌言直自初爲侍郎以至入閣資
緣攀附皆取中旨帝於是溥其爲人令致仕弘治九年

表賀萬壽并以太子年當出閣上承華箴引先朝少保
黃淮事冀召對帝却之正德中卒諡文和

贊曰易稱內君子外小人爲泰外君子內小人爲否况
端揆之寄百寮具瞻者乎陳循以下諸人雖不爲大奸
隱而居心刻伎務逞已私同已者比異已者忌比則相
援忌則相軋至萬安劉吉要結近倖蒙恥固位猶幸同
列多賢相與彌縫匡救而穢跡昭彰小人之歸何可掩
哉

明史卷一百六十八終

將還奉迎禮薄千戶龔遂榮投書於穀具言禮宜從厚
援唐肅宗迎上皇故事穀袖之入朝徧示廷臣曰武夫
尙知禮况儒臣乎衆善其言胡濙王直欲以聞穀曰迎
復議上上意久不決若進此書使上知朝野同心亦一
助也都御史王文不可已而言官奏之詰所從得穀對
曰白臣所因抗章懇請如遂榮言帝雖不從亦不之罪
二年進少保東閣大學士易儲加太子太傅給二俸應
天鳳陽災命祀三陵振貧民七年進謹身殿大學士仍
兼東閣內閣七人言論多難語穀清直持議正王交由
穀薦數擠穀穀屢請解機務不許都給事中林聰忤權

要論死穀力救得薄譴陳循及文構考官劉儼黃諫帝
命禮部會穀覆閱試卷穀力言儼等無私且曰貴胄與
寒士競進已不可况不安義命欲因此構考官乎帝乃
賜循文子中式惟黜林挺一人事得已英宗復位循文
等皆誅竄穀謝病英宗謂穀長者語廷臣曰穀在內閣
議迎駕及南內事嘗左右朕其賜金帛襲衣給驛舟以
歸尋復賜敕獎諭穀既去位杜門絕賓客有問景泰天
順間事輒不應天順四年正月卒年七十穀美丰儀樂
儉素位至台司敝廬瘠田而已成化初贈太保諡文義
胡濙字源潔武進人生而髮白彌月乃黑建文二年舉

進士授兵科給事中永樂元年遷戶科都給事中惠帝之崩於火或言遜去諸舊臣多從者帝疑之五年遣潞頌御製諸書并訪仙人張邈遍行天下州郡鄉邑隱察建文帝安在潞以故在外最久至十四年乃還所至亦間以民隱聞母喪乞歸不許擢禮部左侍郎十七年復出巡江浙湖湘諸州二十一年還朝馳謁帝於宣府帝已就寢聞潞至急起召入潞悉以所聞對漏下四鼓乃出先潞未至傳言建文帝蹈海去帝分遣內臣鄼和數輩浮海下西洋至是疑始釋皇太子監國南京漢王爲飛語謗太子帝改潞官南京因命廉之潞至密疏馳

止監國七事言誠敬孝謹無他帝悅仁宗卽位召爲行在禮部侍郎潞陳十事力言建都北京非便請還南都省南北轉運供億之煩帝皆嘉納旣聞其嘗有密疏疑之不果召轉太子賓客兼南京國子祭酒宣宗卽位仍遷禮部左侍郎明年來朝乃留行在禮部尋進尙書漢王反與楊榮等贊親征事平賚予甚厚明年賜第長安古門外給闈者二人賜銀章四生辰賜宴其第四年命兼理詹事府事六年張本卒又兼領行在戶部時國用漸廣濶慮度支不足蠲租詔下輒沮格帝嘗切戒之然眷遇不少替嘗曲宴潞及楊士奇夏原吉蹇義曰海內

無虞卿等四人力也英宗卽位詔節冗費濬因奏減上
供物及汰法王以下番僧四五百人浮費大省正統五
年山西災詔行寬卹旣而有採買物料之命濬上疏言
詔旨宜信又言軍旗營求差遣因而擾民宜罷之皆報
可行在禮部印失詔弗問命改鑄已又失被劾下獄未
幾卽獲復職九年年七十乞致仕不許英宗北狩羣臣
聚哭於朝有議南遷者濬曰文皇定陵寢於此示子孫
以不拔之計也與侍郎于謙合中外始有固志景帝卽
位進太子太傅楊善使也先濬言上皇蒙塵久宜附進
服食不報上皇將還命禮部具奉迎儀濬等議遣禮部

迎於龍虎臺錦衣具法駕迎居庸關百司迎于城外諸
將迎教場門上皇自安定門入進東安門於東上北門
南面坐皇帝謁見畢百官朝見上皇入南城大內議上
傳旨以一轎二馬迎於居庸關至安定門易法駕餘如
奏給事中劉福等言禮太薄帝報曰朕尊太兄爲太上
皇帝尊禮無加矣福等顧云太薄其意何居禮部其會
官詳察之濬等言諸臣意無他欲陛下篤親親耳帝曰
昨得太上皇書具言迎駕之禮宜從簡損朕豈得違之
羣臣乃不敢言會千戶龔遂榮爲書投大學士高穀言
奉迎宜厚具言唐肅宗迎上皇故事穀袖之以朝與王

直等共觀之直與澗欲聞之帝爲都御史王文所阻而
給事中葉盛竟以聞盛同官林聰復劾直澗穀等皆股
肱大臣有聞必告不宜偶語竊議有詔索書澗等因以
書進且言肅宗迎上皇典禮今日正可做行陛下宜躬
迎安定門外分遣大臣迎龍虎臺帝不悅曰第從朕命
無事紛更上皇至居南城宮澗請帝明年正旦率羣臣
朝廷安門不許上皇萬壽節請令百官拜賀延安門亦
不許三年正月與王直並進少傅易太子加兼太子太
師王文惡林聰文致其罪欲殺之澗不肯署遂稱疾數
日不朝帝使與安問疾對曰老臣本無疾聞欲殺林聰
殊驚悸耳聰由是得釋英宗復位力疾入朝遂求去賜
璽書白金楮幣襲衣給驛官其一子錦衣世鎮撫澗歷
事六朝垂六十年中外稱耆德及歸有三弟年皆七十
餘鬚眉皓白燕聚一堂因名之曰壽愷又七年始卒年
八十九贈太保諡忠安澗節儉寬厚喜怒不形於色能
以身下人在禮部久表賀祥瑞以官當首署名人因謂
其性善承迎南城人龔謙多妖術澗薦爲天文生又薦
道士仰彌高曉陰陽兵法使守邊時頗譏之
王直字行儉泰和人父伯貞洪武十五年以明經聘至
京時應詔者五百餘人伯貞對第一授試僉事分巡廣

東雷州復呂塘廢渠清鹽法會罷分巡官召還爲戶部
主事以父喪服闋不時起謫居安慶建文初復以薦知
瓊州崖州黎相仇殺以反聞且用兵伯貞捕其首惡兵
遂罷瓊田歲常三穫以賦軍軍不時受俟民乏乃急斂
以要利伯貞爲立期三輸之弊始絕居數年大治流民
占籍者萬餘憂歸卒於家直幼而端重家貧力學舉永
樂二年進士改庶吉士與曾棨王英等二十八人同讀
書文淵閣帝善其文召入內閣俾屬草尋授修撰歷事
仁宗宣宗累遷少詹事兼侍讀學士正統三年宣宗實
錄成進禮部侍郎學士如故五年出涖部事尙書胡濙

悉以部政付之直處之若素習者八年正月代郭繼爲
吏部尙書十一年戶部侍郎奈亨附王振擢郎中趙敏
詞連直及侍郎曹義趙新並下獄三法司廷鞫論亨斬
直等贖徒帝宥直義亨新俸帝將親征也先直率廷
臣力諫曰國家備邊最爲謹嚴謀臣猛將堅甲利兵隨
處充滿且耕且守是以久安今敵肆猖獗違天恃理陛
下但宜固封疆申號令堅壁清野蓄銳以待之可圖必
勝不必親御六師遠臨塞下况秋暑未遠旱氣未回青
草不豐水泉猶塞士馬之用未充兵凶戰危臣等以爲
不可帝不從命直留守王師覆於土木大臣羣請太后

立皇子爲皇太子命邸王攝政已勸王卽位以安反側
時變起倉卒朝臣議屢上皆直爲首而直自以不如干
謙每事推下之雍容鎮率而已加太子太保景泰元年
也先使使議和且請還上皇下禮部議未決直率羣臣
上言曰太上皇惑細人言輕身一出至於蒙塵陛下宵
衣旰食徵天下兵與羣臣兆姓同心僇力期滅此朝食
以雪不共戴天之耻迺者天誘其衷也先有悔心之萌
而來求成於我請還乘輿此轉禍爲福之機也望陛下
俯從其請遣使往報因察其誠僞而撫納之奉太上皇
以歸少慰祖宗之心陛下天位已定太上皇還不難

天下事陛下第崇奉之則天倫厚而天眷益隆誠古今
盛事也帝曰卿等言良然但前後使者五輩往終不得
要領今復遣使設彼假送駕爲名來犯京師豈不爲蒼
生患賊詐難信其更議之已而瓦剌別部阿剌使復至
胡濙等復以爲言於是帝御文華殿門召諸大臣及言
官諭以宜絕狀直對曰必遣使毋貽後悔帝不悅于謙
前爲解帝意釋羣臣既退太監興安匍匐出呼曰若等
固欲遣使有文天祥富弼其人乎直大言曰廷臣惟天
子使旣食其祿敢辭難乎言之再聲色愈厲安語塞乃
議遣使命李實羅綺往旣行而瓦剌可汗脫脫不花及

也先使先後至將遣歸使者謂館伴曰中國關外十四城皆爲我有前阿剌知院使來尙遣人偕往今亦必得大臣同行庶有濟胡濛以聞下廷議直等固請乃遣楊善等報之比實還又以也先使至具言也先欲和狀直與寧陽侯陳懋等上疏請更遣使齎禮幣往迎上皇不許復上疏曰臣等與李實語具得彼中情事其所需衣物資斧者上皇言也而奉迎車駕也先意也昨者脫脫不花及阿剌知院使來皆有報使令也先使以迎請爲辭乃不遣使與偕是疑敵而召兵也又不許已而實自言於帝帝第報也先言就入楊善迎歸而已直等復上

言今北使已發願本上皇之心順臣民之願因彼悔心遣使往報以圖迎復此不待計而決者也不然衆志難犯違天不祥彼將執爲兵端邊事益棘京師亦不得高枕臥矣帝乃命羣臣擇使直與陳懋等請仍遣實報曰候善歸議之御史畢鑿等復上疏力言就令彼以詐來我以誠往萬一不測則我之兵力固在帝終不聽已而善竟奉上皇還二年也先遣使入貢且請答使直屢疏言邊備未修芻糧未積瘡痍未復宜如其請遣使往以觀虛實開導其善不許無何也先遣騎入塞以報使爲辭直與羣臣復請之卒不許直等乃上疏言陛下銳意

治兵爲戰守計真大有爲之主然使命不通難保其不爲寇宜敕沿邊守臣發兵遊徼有警則入保無事則力耕陛下於機務之暇時召京管總督總兵詢以方畧誠接而禮貌之信賞罰以持其後斯戰守可言也帝曰善明年正月進少傅帝欲易太子未發會思明土知府黃玆以爲請帝喜下禮部議胡濙唯唯文武諸臣議者九十一人當署名直有難色陳循濡筆強之乃署竟易皇太子直進兼太子太師賜金幣加等頓足歎曰此何等大事乃爲一蠻酋所壞吾輩愧死矣景帝疾亟直濙等會諸大臣臺諫請復立沂王爲皇太子推大學士商輅

草疏未上而石亨徐有貞等奪門迎上皇復位殺王文等疏草留姚夔所嘗出以示郎中陸昶歎曰是疏不及進天也直遂乞休賜璽書金綺楮幣給驛歸直爲八方面修髯儀觀甚偉性嚴重不苟言笑及與人交恂恂如也在翰林二十餘年稽古代言編纂紀注之事多出其手與金谿王英齊名人稱二王以居地目直曰東王英曰西王直以次當入閣楊士奇不欲也及長吏部益廉頃時初罷廷臣薦舉方面大吏專屬吏部直委任曹郎嚴抑奔競凡御史巡方歸者必令具所屬賢否以備選擢稱得人其子積爲南園子博士考績至部文選郎欲

留侍直直不可曰是亂法自我始也朝廷以直老命何
文淵爲尙書佐之文淵去又命王翱部遂有二尙書直
爲尙書十四年年益高名德日益重帝優禮之免其常
朝比家居嘗從諸佃僕耕蒔擊鼓歌唱諸子孫更迭舉
觴上壽直歎曰曩者西楊抑我令不得共事然使我在
閣今上復辟當不免遼陽之行安得與汝曹爲樂哉天
順六年卒年八十四贈太保諡文端積仕至翰林檢討
亦以學行稱曾孫思自有傳
贊曰高穀之清直胡濙之寬厚王直之端重蓋皆有大
臣之度焉當英景之間國勢初更人心觀望執政任事
之臣多阿意取容而穀濙惓惓於迎駕之儀直侃侃於
遣使之請皆力持正議不隨衆俛仰故能身負碩望始
終一節可謂老成人矣

于

謙

子

見

吳

寧

于謙字廷益錢塘人生七歲有僧奇之曰他日救時宰
相也舉永樂十九年進士宣德初授御史奏對音生鴻
揚帝爲傾聽顧佐爲都御史待寮屬甚嚴獨下謙以爲
才勝已也扈蹕樂安高煦出降帝命謙口數其罪謙正
詞嶄嶄聲色震厲高煦伏地戰慄稱萬死帝大悅師還
明史卷一百六十九終

處官校爲民害詔遣御史捕之帝知謙可大任曾增設各部右侍郎爲直省巡撫乃手書謙名授吏部超遷兵部右侍郎巡撫河南山西謙至官輕騎徧歷所部延訪父老察時事所宜興革卽具疏言之一歲凡數上小有水旱輒上聞正統六年疏言今河南山西積穀谷數百萬請以每歲三月令府州縣報缺食下戶隨分支給先菽秫次黍麥次稻俟秋成償官而免其老疾及貧不能償者州縣吏秩滿當遷預備糧有未足不聽離任仍令風憲官以時稽察詔行之河南近河處時有衝決謙令厚築隄障計重置亭亭有長責以督率修繕並令種樹

鑿井榆柳夾路道無渴者大同孤懸塞外按山西者不及至奏別設御史治之盡奪鎮將私墾田爲官屯以資邊用威惠流行太行伏盜皆避匿在官九年遷左侍郎食二品俸初三楊在政府雅重謙謙所奏朝上父報可皆三楊主持而謙每議事京師空橐以入諸權貴人不能無望及是三楊已前卒太監王振方用事適有御史姓名類謙者嘗忤振謙入朝薦參政王來孫原貞自代通政使李錫阿振指劾謙以久不遷怨望擅舉人自代下法司論死繫獄三月已而振知其誤得釋左遷大理寺少卿山西河南吏民伏闕上書請留謙者以千數周

晉諸王亦言之乃復命謙巡撫時山東陝西流民就食河南者二十餘萬謙請發河南懷慶二府積粟以振又奏令布政使年富安集其衆授田給牛種使里老司察之前後在任十九年丁內外艱皆令歸治喪旋起復十三年以兵部左侍郎召明年秋也先大入寇王振挾帝親征謙與尙書廊埜極諫不聽埜從治兵留謙理部事及駕陷土木京師大震衆莫知所爲郟王監國命羣臣議戰守侍講徐理言星象有變當南遷謙厲聲曰言南遷者可斬也京師天下根本一動則大事去矣獨不見宋南渡事乎王是其言守議乃定時京師勁甲精騎皆

陷沒所餘疲卒不及十萬人心震恐上下無固志謙請王檄取兩京河南備操軍山東及南京沿海備倭軍江北及北京諸府運糧軍亟赴京師以次經畫部署人心稍安卽遷本部尙書郟王方攝朝廷臣請族誅王振而振黨馬順者輒叱言官於是給事中王竑廷擊順衆隨之朝班大亂衛卒聲洶洶王懼欲起謙排衆直前掖王止且啟王宣諭曰順等罪當死勿論衆乃定謙袍袖爲之盡裂退出左掖門吏部尙書王直執謙手歎曰國家正賴公耳今日雖百王直何能爲當是時上下皆倚重謙謙亦毅然以社稷安危爲己任初大臣憂國無主太

子方幼寇且至請皇太后立郕王王驚謝至再謙颺言
曰臣等誠憂國家非爲私計王乃受命九月景帝立謙
入對慷慨泣奏曰寇得志要留大駕勢必輕中國長驅
而南請飭諸邊守臣協力防遏京營兵械且盡宜亟分
道募民兵令工部繕器甲遣都督孫鏗衛穎張軌張儀
雷通分兵守九門要地列營郭外都御史楊善給事中
王竑參之徙附郭居民入城通州積糧令官軍自詣關
支以贏米爲之直毋棄以資敵文臣如軒輓者宜用爲
巡撫武臣如石亨楊洪柳溥者宜用爲將帥至軍旅之
事臣身當之不効則治臣罪帝深納之十月敕謙提督

各營軍馬而也先挾上皇破紫荆關直入窺京師石亨
議斂兵堅壁老之謙不可曰奈何示弱使敵益輕我亟
分遣諸將率師三十二萬列陣九門外都督洵瑾安定
門廣寧伯劉安東直門武進伯朱瑛朝陽門都督劉聚
西直門鎮遠侯顧興祖阜成門都指揮李端正陽門都
督劉得新崇文門都指揮湯節宣武門而謙自與石亨
率副總兵范廣武興陳德勝門外當也先以部事付侍
郎吳寧悉閉諸城門身自督戰下令臨陣將不顧軍先
退者斬其將軍不顧將先退者後隊斬前隊於是將士
知必死皆用命副總兵高禮毛福壽却敵彰義門北禽

其長一人帝喜令謙選精兵屯教場以便調用復命太監與安李永昌同謙理軍務初也先深入視京城可旦夕下及見官軍嚴陣待意稍沮叛闖喜寧嗾使邀大臣迎駕索金帛以萬萬計復邀謙及王直胡濙等出議帝不許也先氣益沮庚申寇窺德勝門謙令亨設伏空舍遣數騎誘敵敵以萬騎來薄副總兵范廣發火器伏起齊擊之也先弟孛羅平章卯那孩中礮死寇轉至西直門都督孫鏗禦之亨亦分兵至寇引退副總兵武興擊寇彰義門與都督王敬柱其前鋒寇且却而內官數百騎欲爭功躍馬競前陣亂與被流矢死寇逐至土城居

以升屋號呼投磚石擊寇譁聲動天王竑及福壽援至寇乃却相持五日也先邀請既不應戰又不利知終弗可得志又聞勤王師且至恐斷其歸路遂擁上皇由良鄉西去謙調諸將追擊至關而還論功加謙少保總督軍務謙曰四郊多壘卿大夫之恥也敢邀功賞哉固辭不允乃益兵守真保涿易諸府州請以大臣鎮山西防寇南侵景泰元年三月總兵朱謙奏敵二萬攻圍萬全救范廣充總兵官禦之已而寇退謙請卽駐兵居庸寇來則出關剿殺退則就糧京師大同叅將許貴奏迤北有三人至鎮欲朝廷遣使講和謙曰前遣指揮季鐸岳

謙往而也先隨入寇繼遣通政王復少卿趙榮不見上
皇而還和不足恃明矣况我與彼不共戴天理固不可
和萬一和而彼肆無厭之求從之則坐敝不從則生變
勢亦不得和貴爲介冑臣而懼怯如此何以敵愾法當
誅移檄切責自是邊將人人主戰守無敢言講和者初
也先多所要挾皆以喜寧爲謀主謙密令大同鎮將禽
寧戮之又計授王偉誘誅間者小田兒且因謀用間請
特釋忠勇伯把台家許以封爵使陰圖之也先始有歸
上皇意遣使通款京師稍解嚴謙上言南京重地撫輯
須人中原多流民設遇歲荒曠聚可虞乞敕內外守備

及各巡撫加意整飭防患未然召還所遣召募文武官
及鎮守中官在內地者於時八月上皇北狩且一年矣
也先見中國無釁滋欲乞和使者頻至請歸上皇大臣
王直等議遣使奉迎帝不悅曰朕本不欲登大位當時
見推實出卿等謙從容曰天位已定寧復有他顧理當
遠奉迎耳萬一彼果懷詐我有辭矣帝顧而改容曰從
汝從汝先後遣李實楊善往卒奉上皇以歸謙力也上
皇旣歸瓦剌復請朝貢先是貢使不過百人正統十三
年至三千餘賞賚不饜遂入寇及是又遣使三千來朝
謙請列兵居庸關備不虞京師盛陳兵宴之因言和議

難恃條上安邊三策請收大同宣府永平山海遼東各路總兵官增修備禦京兵分隸五軍神機三千諸營雖各有總兵不相統一請擇精銳十五萬分十營團操團營之制自此始具兵志中瓦剌入貢每擢故所掠人口至謙必奏酬其使前後贖還累數百人初永樂中降人安置近畿者甚衆也先入寇多爲內應謙謀散遣之因西南用兵每有征行輒選其精騎厚資以往已更遣其妻子內患以息楊洪自衛石入衛八城悉以委寇謙使都督孫安以輕騎出龍門關據之募民屯田且戰且守八城遂復貴州苗未平何文淵議罷二司專設都司以

六將鎮之謙曰不設二司是棄之也議乃寢謙以上皇雖還國恥未雪會也先與脫脫不花構請乘間大發兵身往討之以復前仇除邊患帝不許謙之爲兵部也也先勢方張而福建鄧茂七浙江葉宗留廣東黃蕭養各擁衆僭號湖廣貴州廣西徭獍苗獠所至蜂起前後征調皆謙獨運當軍馬倥傯變在俄頃謙目視指屈口具章奏悉合機宜僚吏受成相顧駭服號令明審雖勲臣宿將小不中律卽請旨切責片紙行萬里外靡不惕息其才畧開敏精神周至一時無與比至性過人憂國忘身上皇雖歸口不言功東宮旣易命兼宮僚者支二俸

諸臣皆辭謙獨辭至再自奉儉約所居僅蔽風雨帝賜第西華門辭曰國家多難臣子何敢自安固辭不允乃取前後所賜璽書袍錠之屬悉加封識歲時一省視而已帝知謙深所論奏無不從者嘗遣使往真定河間采野菜直沽造乾魚謙一言卽止用一人必密訪謙謙具實對無所隱不避嫌怨由是諸不任職者皆怨而用弗如謙者亦往往嫉之比寇初退都御史羅通卽劾謙上功簿不實御史顧暉言謙太專請六部大事同內閣奏行謙據祖制折之戶部尙書金濂亦疏爭而言者拮據不已諸御史以深文彈劾者屢矣賴景帝破衆議用之

得以盡所設施謙性故剛遇事有不如意輒拊膺歎曰此一腔熱血竟灑何地視諸選與大臣勲舊貴戚意頗輕之憤者益衆又始終不主和議雖上皇實以是得還不快也徐理以議南遷爲謙所斥至是改名有貞稍稍進用嘗切齒謙石亨本以失律削職謙請宥而用之總兵十營畏謙不得逞亦不樂謙德勝之捷亨功不加謙而得世侯內媿乃疏薦謙子冕詔赴京師辭不允謙言國家多事臣子義不得顧私恩且亨位大將不聞舉一幽隱拔一行伍微賤以裨軍國而獨薦臣子於公議得乎臣於軍功力杜僥倖決不敢以子濫功亨復大恚都

督張軌以征苗失律爲謙所劾與內侍曹吉祥等皆素憾謙景泰八年正月壬午亨與吉祥有貞等旣迎上皇復位宜諭朝臣畢卽執謙與大學士王文下獄誣謙等與黃珙構邪議更立東宮又與太監王誠舒良張永王勤等謀迎立襄王子亨等主其議喉言官上之都御史蕭惟禎定讞坐以謀逆處極刑文不勝誣辯之疾謙笑曰亨等意耳辯何益奏上英宗尙猶豫曰于謙實有功有貞進曰不殺于謙此舉爲無名帝意遂決丙戌改元天順丁亥棄謙市籍其家家戍邊遂溪教諭吾豫言謙罪當族謙所薦舉諸文武大臣並應誅部議持之而止

千戶白琦又請榜其罪鏤板示天下一時希旨取寵者率以謙爲口實謙自值也先之變誓不與賊俱生嘗留宿直廬不還私第素病痰疾作景帝遣興安舒良更番往視聞其服用過薄詔令上方製賜至醢菜畢備又親幸萬歲山伐竹取瀝以賜或言寵謙太過興安等曰彼日夜分國憂不問家產卽彼去令朝廷何處更得此人及籍沒家無餘貲獨正室鑄鑰甚固啟視則上賜蟒衣劍器也死之日陰霾四合天下寃之指揮朵兒者本出曹吉祥部下以酒酹謙死所慟哭吉祥怒扶之明日復酹奠如故都督同知陳達感謙忠義收遺骸殯之踰年

歸葬杭州達六合人故舉將才出李時勉門下者也皇太后初不知謙死比聞嗟悼累日英宗亦悔之謙既死而亨黨陳汝言代爲兵部尙書未一年敗賊累巨萬帝召大臣入視愀然曰于謙被遇景泰朝死無餘貲汝言抑何多也亨俯首不能對俄有邊警帝憂形於色恭順侯吳瑾侍進曰使于謙在當不令寇至此帝爲默然是年有貞爲亨所中戍金齒又數年亨亦下獄死吉祥謀反族誅謙事白成化初冕赦歸上疏訟寃得復官賜祭誥曰當國家之多難保社稷以無虞惟公道之獨持爲權奸所並嫉在先帝已知其枉而朕心實憐其忠天下

傳誦焉弘治二年用給事中孫霖言贈特進光祿大夫柱國大傅謚肅愍賜祠於其墓曰旌功有司歲時致祭萬曆中改謚忠肅杭州河南山西皆世奉祀不絕冕字景瞻廕授副千戶坐戍龍門謙寃旣雪并復冕官自陳不願武職改兵部員外郎居官有幹局累遷至應天府尹致仕卒無子以族子允忠爲後世襲杭州衛副千戶奉祠吳寧字永清歛人宣德五年進士除兵部主事正統中再遷職方郎中郟王監國謙薦擢本部右侍郎謙禦寇城外寧掌部事命赴軍中議方畧比還城門弗啟寇騎充斥寧立雨中指揮兵士移時乃入寇旣退畿民

明史卷一百一十一 列傳 十一
猶日數驚相率南徙或議仍召勤王兵寧曰是益之使
驚也莫若告捷四方人心自定因具奏行之景泰改元
以疾乞歸後不復出家居三十餘年卒寧方介有識鑑
嘗爲謙擇婿得千戶朱驥謙疑之寧曰公他日當得其
力謙被刑驥果歸其喪葬之驥自有傳王備字士英攸
八年十四隨父謫戍宣府宣宗巡邊獻安邊頌命補保
安州學生舉正統元年進士改庶吉士授戶部主事英
宗北狩命行監察御史事集民壯守廣平謙引爲職方
司郎中軍書填委處分多中窾會遂薦擢兵部右侍郎
出視邊叛人小田兒爲敵間諜屬備圖之會田兒隨貢

使入至陽和城壯士從道旁突出斷其頭去使者不敢
詰備喜任智數旣爲謙所引恐嫉謙者目已爲朋附嘗
密奏謙誤冀自解帝以其奏授謙叩頭謝帝曰吾自
知卿何謝爲謙出備問上與公何言謙笑曰我有失望
君面規我何至爾邪出奏示之偉大慙沮然竟坐謙黨
罷歸成化三年復官請毀白琦所鏤板踰年告病歸卒
贊曰子謙爲巡撫時聲績表著卓然負經世之才及時
遘艱虞繕兵固圉景帝旣推心置腹謙亦憂國忘家身
繫安危志存宗社厥功偉矣變起奪門禍機猝發徐石
之徒出力而擠之死當時莫不稱冤然有貞與亨吉祥

相繼得禍皆不旋踵而謙忠心義烈與日月爭光卒但復官賜卹公論久而後定信夫

明史卷一百七十終

明史卷一百七十一

列傳第五十九

總管總理事務 經筵講官 保兼李太監 和殿大學士 兼冀部戶部尚書 嘉六級 張廷玉 奉 救修

王驥 孫 瑾

徐有貞

楊善

李實 趙榮

固王 越

王驥字尚德 東鹿人 長身偉幹 便騎射 剛毅有膽 曉暢戎畧 中永樂四年進士 為兵科給事中 使山西 奏免鹽池逋課二十餘萬 尋遷山西按察司副使 洪熙元年入為順天府尹 宣德初擢兵部右侍郎 代顧佐 署都察院 久之 署兵部尚書 九年命為真正 統元年奉詔議邊事

越五日未奏帝怒執驥與侍郎鄺瑩下之獄尋得釋阿
台朶兒只伯數寇甘涼邊將屢失利侍郎柴車徐晞都
御史曹翼相繼經理邊務未能制二年五月命驥往許
便宜行事驥疾驅至軍大會諸將問往時追敵魚兒海
子先退敗軍者誰僉曰都指揮安敬驥先承密旨戮敬
遂縛敬斬轅門并宣敕責都督蔣貴諸將皆股慄驥乃
大閱將士分兵畫地使各自防禦邊境肅然閱軍甘涼
汰三之一定更番法兵得休息而轉輸亦省俄阿台復
入寇帝以任禮爲平羌將軍蔣貴趙安爲副驥督軍三
年春偕諸將出塞以貴爲前鋒而自與任禮帥大軍後

繼與貴約曰不捷無相見也貴擊敵石城敵走兀魯乃
貴帥輕騎二千五百人出鎮夷間道兼行三日夜及之
禽左丞脫羅斬首三百餘獲金銀印各一駝馬兵甲千
計驥與禮自梧桐林至亦集乃禽樞密同知僉院十五
人萬戶二人降其部落窮進至黑泉而趙安等出昌寧
至才力溝亦禽右丞達魯花赤三十人分道夾擊轉戰
千餘里朶兒只伯遠遁論功貴禮皆封伯而驥兼大理
卿支二俸尋召還理部事久之麓川之役起麓川宣慰
使思任發叛數敗王師黔國公沐晟討之不利道卒以
沐昂代昂條上攻取策徵兵十二萬人中官王振方用

事喜功名以驥可屬思大舉驥亦欲自效六年正月遂拜蔣貴平蠻將軍李安劉聚爲副而驥總督軍務大發東南諸道兵十五萬討之刑部侍郎何文淵侍講劉球先後疏諫不納瀕行賜驥貴金兜牟緹鎧蟒繡緋衣朱弓矢驥請得以便宜從事馳傳至雲南部署諸將遣參將冉保山東路趨孟定大軍由中路至騰衝分道夾擊是年十一月與貴以二萬人趨上江圍其寨五日不下會大風縱火焚柵拔之斬首五萬餘級進自夾象石度下江通高黎貢山道閏月至騰衝長驅抵杉木籠山賊乘高據險築七壘相收驥遣叅將宮聚副將劉聚分左

右翼緣嶺上而自將中軍奮擊之賊大潰乘勝至馬鞍山踰月抵賊巢出陡絕深塹環之東南面江壁立不可上驥遣前軍覘賊敗其伏兵賊更自間道立柵馬鞍山出大軍後驥戒軍中無動而令都指揮方瑛以六千人突賊寨斬首數百復誘敗其象陣會東路軍冉保等已合木邦車里大侯諸土軍破烏木弄戛邦諸寨遣別將守西峩渡防賊軼刻期與大軍會驥乃督諸將環攻其七門積薪縱火風大作賊焚死無算溺江死者數萬人思任發攜二子走孟養獲其虎符金牌宣慰司印及所掠騰衝諸衛所印章三十有奇犁其巢穴留兵守之而

還明年四月遣偏師討維摩土司韋郎羅郎羅走安南
俘其妻子傳檄安南縛之以獻五月師還帝遣戶部侍
郎王質齎羊酒迎勞賜宴奉天門封推誠宣力武臣特
進榮祿大夫上柱國靖遠伯歲祿千二百石世襲指揮
同知賜貂蟬冠玉帶貴進侯劉聚等遷賞有差從征少
卿李蕢郎中侯璉楊寧皆擢侍郎士卒賜予加等府庫
爲竭思任發之竄緬甸也其子思機發復帥餘衆居者
藍乞入朝謝罪廷議因而撫之王振不可是年八月復
命驥總督雲南軍務帥叅將冉保毛福壽以往未至而
思機發遣弟招寨入貢緬甸亦奏獲思任發要麓川地

朝廷不納其貢且救驥圖緬甸驥因請濟師八年五月
復命蔣貴爲平蠻將軍調士兵五萬往發卒轉餉五十
萬人驥初檄緬甸送思任發緬人陽聽命持兩端是年
冬大軍逼緬甸緬人以樓船載思任發覘官軍而潛以
他舟載之歸驥知緬人資木邦水利爲唇齒且慮思機
發將以獻其父故仇之故終不肯獻思任發驥乃趨者
藍破思機發巢得其妻子部落而思機發獨脫去明年
召還加祿三百石命與都御史陳鎰巡延綏寧夏甘肅
諸邊初寧夏備邊軍半歲一更後邊事亟三年乃更軍
士日久疲罷又益選軍餘防冬家有五六人在邊者軍

用重困驥請歲一更當代者以十月至而代者留至來
年正月乃遣歸邊備足而軍不勞帝善其議行之諸邊
當是時緬人已以思任發來獻而思機發竊駐孟養地
屢遣使入貢謝罪中外咸願罷兵振意終未慊焉思機
發躬入朝謝沐斌帥師至金沙江招之不至論孟養執
之以獻亦不聽命於是振怒欲盡滅其種類十三年春
復命驥總督軍務宮聚爲平蠻將軍帥師十五萬人往
明年造舟浮金沙江蠻人柵西岸拒守官軍聯舟爲浮
橋以濟拔其柵進破鬼哭山連下十餘寨墜溺死者無
算而思機發終脫去不可得是時官軍踰孟養至孟卯

海地在金沙江西去麓川千里自古兵力所不至諸蠻
見大軍皆震怖而大軍遠涉驥慮餽餉不繼亟謀引還
時思機發雖遁置而思任發少子思陸復擁衆據孟養
驥度賊終不可滅乃與思陸約立石表誓金沙江上曰
石爛江枯爾乃得渡遂班師驥凡三征麓川卒不得思
機發議者咎驥等老師費財以一隅騷動天下而會川
衛訓導詹英抗疏劾之大畧謂驥等多役民夫昇絲繒
散諸土司以邀厚利擅用腐刑詭言進御實充私役師
行無紀十五萬人一日起行互相蹂踐每軍負米六斗
跋涉山谷自縊者多抵金沙江徬徨不敢渡旣渡不敢

明史卷一百一十一 列傳五
攻攻而失都指揮路宣翟亨等俟賊解多捕魚戶爲俘
以地分木邦緬甸掩敗爲功此何異李宓之敗而楊國
忠以捷聞也奏下法司王振左右之得不問而命英從
驥軍自效英知往且獲罪匿不去當是時湖廣貴州諸
苗所在蜂起圍平越及諸城堡貴州東路閉驥至武昌
詔還軍討苗會英宗北狩羣臣劾王振并及驥以驥方
在軍且倚之平苗置弗問命佩平蠻將軍印充總兵官
侍郎侯璉總督軍務已而苗益熾衆至十餘萬平越被
圍半歲巡按御史黃鎬死守糧盡掘草根食之而驥頓
軍辰沅不進景泰元年鎬草疏置竹筒中募人自間道

出聞於朝更命保定伯梁瑤爲平蠻將軍益兵二萬人
侯璉自雲南督之前疾戰大破賊盡解諸城圍而驥亦
俘剡平王蟲富等以獻驥還命總督南京機務其冬乞
世券與之南畿軍素偷惰驥至以所馭軍法教之于謙
弗重也朝廷以其舊臣寵禮之三年四月賜敕解任奉
朝請驥年七十餘躍馬食肉盛聲伎如故久之石亨徐
有貞等奉英宗復辟驥與謀賞稍後上章自訟言臣子
祥入南城爲諸將所擠墮地幾死今論功不及疑有蔽
之者帝乃官祥指揮僉事而命驥仍兵部尚書理部事
加號奉天翊衛推誠宣力守正文臣光祿大夫餘如故

數月請老又三年乃卒年八十三贈靖遠侯諡忠毅傳
子瑞及孫添添尚嘉善長公主再傳至孫瑾嘉靖初提
督三千營協守南京還掌左府久之佩征蠻將軍印鎮
兩廣廣東新寧新興思平間多高山叢箐亡命者輒入
諸徭中吏不得問衆至萬餘人流劫高要陽江諸縣官
軍討之輒失利三十五年春瑾與巡撫都御史談愷檄
諸路上兵誅其魁陳以明悉平諸巢捷聞加太子太保
而扶藜葵梅諸山崗馮天恩等據險爲寇者亦數十年
瑾復督軍分道進剿破巢二百餘復以功廕一子錦衣
百戶言官劾其暴橫召還爵傳至明亡乃絕

徐有貞字元玉初名理吳人宣德八年進士選庶吉士
授編修爲人短小精悍多智數喜功名凡天官地理兵
法水利陰陽方術之書無不諳究時承平旣久邊備媮
惰而西南用兵不息理以爲憂正統七年疏陳兵政五
事帝善之而不能用十二年進侍講十四年秋笑惑入
南斗理私語友人劉溥曰禍不遠矣亟命妻子南還及
土木難作郟王召廷臣問計理大言曰驗之星象稽之
歷數天命已去惟南遷可以紓難太監金英叱之胡濙
陳循咸執不可兵部侍郎于謙曰言南遷者可斬也理
大沮不敢復言景帝卽位遣科道官十五人募兵於外

程行監察御史事往彰德寇退召還仍故官程急於進
取自劾南遷議爲內廷訕笑久不得遷因遣陳循玉帶
且用星術言公帶將玉矣無何循果加少保大喜因屢
薦之而是時用人多決於少保于謙程屬謙門下士遊
說求國子祭酒謙爲言於帝帝曰此議南遷徐程邪爲
人傾危將壞諸生心術理不知謙之薦之也以爲沮已
深怨謙循勸理改名因名有貞景泰三年遷右諭德河
決沙灣七載前後治者皆無功廷臣共舉有貞乃擢左
僉都御史治之至張秋相度水勢條上三策一置水門
一開支河一濬運河議既定督漕都御史王竑以漕渠

淤淺滯運艘請急塞決口帝敕有貞如竑議有貞守便
直言臨清河淺舊矣非因決口未塞也漕臣但知塞決
口爲急不知秋冬雖塞來春必復決徒勞無益臣不敢
邀近功詔從其言有貞於是大集民夫躬親督率治渠
建閘起張秋以接河沁河流之旁出不順者爲九堰障
之更築大堰樅以水閉閘五百五十五日而工成名其
渠曰廣渠閘曰通源方工之未成也帝以轉漕爲急工
部尚書江淵等請遣中書偕文武大臣督京軍五萬人
往助役期三月畢工有貞言京軍一出日費不貲遇漲
則束手坐視無所施力今泄口已合決堤已堅但用沿

河民夫自足集事議遂寢事竣召還佐院事帝厚勞之復出巡視漕河濟寧十三州縣河夫多負官馬及他雜辦所司趣之亟有貞爲言免之七年秋山東大水河堤多壞惟有貞所築如故有貞乃修舊隄決口自臨清抵濟寧各置減水閘水患悉平還朝帝召見獎勞有加進左副都御史八年正月景帝不豫石亨張軏等謀迎上皇以告太常卿許彬彬曰此不世功也彬老矣無能爲徐元玉善奇策盍與圖之亨卽夜至有貞家聞之大喜曰須令南城知此意軏曰陰達之矣令太監曹吉祥入白太后辛巳夜諸人復會有貞所有貞升屋覽乾象亟下曰時至矣勿失八時方有邊警有貞令軏詭言備非常勒兵入大內亨掌門鑰夜四鼓開長安門納之旣入復閉以遏外兵時天色晦冥亨軏皆惶惑謂有貞曰事當濟否有貞大言必濟趣之行旣薄南城門鎗毀牆以入上皇燈下獨出問故有貞等俯伏請登位乃呼進蠻兵士惶懼不能舉有貞率諸人助挽以行星月忽開朗上皇各問諸人姓名至東華門門者拒弗內上皇曰朕太上皇帝也遂反走乃升奉天門有貞等常服謁賀呼萬歲景帝明當視朝羣臣咸待漏闕下忽聞殿中呼噪聲方驚愕俄諸門畢啟有貞出號於衆曰太上皇帝復位

矣趣入賀卽日命有貞兼學士入內閣叅預機務明日
加兵部尚書有貞謂亨曰願得冠側注從兄後亨爲言
於帝封武功伯兼華蓋殿大學士掌文淵閣事賜號奉
天翊衛推誠宣力守正文臣祿千一百石世錦衣指揮
使給誥券有貞遂誣少保于謙大學士王文殺之內閣
諸臣斥逐畧盡陳循素有德於有貞亦弗救也事權盡
歸有貞中外咸側目而有貞愈益發舒進見無時帝亦
傾心委任有貞旣得志則思自異於曹石窺帝於三人
不能無厭色乃稍稍裁之且微言其貪橫狀帝亦爲之
動御史楊瑄奏劾亨言祥侵占民田帝問有貞及李賢

皆對如瑄奏有詔獎瑄亨吉祥大怨恨日夜謀搆有貞
帝方眷有貞時屏人密語吉祥令小豎竊聽得之故洩
之帝帝驚問曰安所受此語對曰受之有貞某日語某
事外間無弗聞帝自是疏有貞會御史張鵬等欲糾亨
他罪未上而給事中王鉉泄之亨吉祥二人乃泣訴於
帝謂內閣實主之遂下諸御史獄併逮繫有貞及李賢
忽雷雹交作大風折木帝感悟重違亨意乃釋有貞出
爲廣東叅政亨等憾未已必欲殺之令人投匿名書指
斥乘輿云有貞怨望使其客馬士權者爲之遂追執有
貞於德州并士權下詔獄榜治無驗會承天門災肆赦

亨吉祥慮有貞見釋言於帝曰有貞自撰武功伯券辭
云纘禹成功又自擇封邑武功禹受禪爲帝武功者曹
操始封也有貞志圖非望帝出以示法司刑部侍郎劉
廣衡等奏當棄市詔徙金齒爲民亨敗帝從容謂李賢
王翽曰徐有貞何大罪爲石亨輩所陷耳其釋歸田里
成化初復冠帶閒住有貞既釋歸猶冀帝復召時時仰
觀天象謂將星在吳益自負常以鐵鞭自隨數起舞及
聞韓雍征兩廣有功乃擲鞭太息曰孺子亦應天象邪
遂放浪山水間十餘年乃卒有貞初出獄時拊士權背
曰子義士也他日一女相託金齒歸士權時往候之絕

不及婚事士權辭去終身不言其事人以是薄有貞而

重士權

楊善字思敬大興人年十七爲諸生成祖起兵預城守
有勞授典儀所引禮舍人永樂元年改鴻臚寺序班善
偉風儀音吐洪亮工進止每朝謁引進奏時上目屬之
累進右寺丞仁宗卽位擢本寺卿宣德六年被劾下獄
褫冠帶踰月正統六年子容詐作中官書假金於尚書
吳中事覺謫戍威遠衛置善不問久之擢禮部左侍郎
仍視鴻臚事十四年八月扈駕北征及土木師潰善間
行得脫也先將入寇改左副都御史與都督王通提督

明史卷一百一十一 及傳 二
京城守備寇退進右都御史視鴻臚如故景泰元年廷
臣朝正畢循故事相賀於朝房善獨流涕曰上皇在何
所而我曹自相負乎衆媿爲之止是年夏李實羅綺使
及刺議罷兵未還而也先使至言朝廷遣使報阿刺知
院而不遣大臣報可汗及太師事必不濟尚書王直等
奏其言廷議簡四人爲正副使與偕行帝命俟李實還
議之已而實將至乃命善及侍郎趙榮爲使齎金銀書
幣往先是袁敏者請齎服御物問上皇安不納及是尚
書胡濙等言上皇蒙塵久御用服食宜付善等隨行亦
不報時也先欲還上皇而敕書無奉迎語自齎賜也先

外善等無他賜善乃出家財悉市彼中所需者攜以往
既至其館伴與飲帳中詫善曰土木之役六師何怯也
善曰彼時官軍壯者悉南征王司禮邀大駕幸其里不
爲戰備故令汝得志耳今南征將士歸可二十萬又募
中外材官技擊可三十萬悉教以神鎗火器藥弩百步
外洞人馬腹立死又用策士言緣邊要害隱鐵椎三尺
馬蹄踐輒穿又刺客林立夜度營幕若猿猱伴色動善
曰惜哉今皆置無用矣問何故曰和議成歡好且若兄
弟安用此因以所齎遺之其人喜悉以語也先明日謁
也先亦大有所遺也先亦喜善因詰之曰太上皇帝朝

太師遣貢使必三千人歲必再資金幣載途乃背盟見
攻何也也先曰奈何削我馬價子帛多剪裂前後使人
往多不歸又減歲賜善曰非削也太師馬歲增價難繼
而不忍拒故微損之太師自度價比前孰多也帛剪裂
者通事爲之事露誅矣卽太師貢馬有劣弱貂或敝亦
豈太師意耶且使者多至三四千人有爲盜或犯他法
歸恐得罪故自亡耳留若奚爲貢使受宴賜上名或浮
其人數朝廷核實而予之所減乃虛數有其人者固不
減也也先屢稱善善復曰太師再攻我屠戮數十萬太
師部曲死傷亦不少矣上天好生太師好殺故數有雷

警今還上皇和好如故中國金幣日至兩國俱樂不亦
美乎也先曰敕書何以無奉迎語善曰此欲成太師令
名使自爲之若載之敕書是太師迫於朝命非太師誠
心也也先大喜問上皇歸將復得爲天子乎善曰天位
已定難再移也先曰堯舜如何善曰堯讓舜今兄讓弟
正相同也其平章昂克問善何不以重寶來購善曰若
齎貨來人謂太師圖利今不爾乃見太師仁義爲好男
子垂史策頌揚萬世也先笑稱善知院伯顏帖木耳勸
也先留使臣而遣使要上皇復位也先懼失信不可竟
許善奉上皇還時舉朝競奇善功而景帝以非初遣旨

薄其賞遷左都御史仍蒞鴻臚事二年廷臣朝正旦畢
修賀朝房善又曰上皇不受賀我曹何相賀也三年正
月加太子太保六年以衰老乞致仕優詔不許善狀貌
魁梧應對捷給然無學術滑稽對客鮮莊語家京師治
第郭外園多善果歲時饋公卿戚里中貴無不得其歡
心王振用事善媚事之至是又與石亨曹吉祥結天順
元年正月亨吉祥奉上皇復辟善以預謀封奉天翊衛
推誠宣力武臣特進光祿大夫柱國興濟伯歲祿千二
白石賜世券掌左軍都督府事尚書胡濙頌善迎駕功
命兼禮部尚書尋改守正文臣善使戾刺攜子四人行

至是竝得官又爲從子養子乞恩得官者復十數人氣
勢烜赫招權納賄亨輩嫉而間之以是漸疎外二年五
月卒贈興濟侯諡忠敏善負才辨以巧取功名而儉忮
爲士論所棄其爲序班坐事與庶吉士章樸同繫獄久
之相狎時方窮治方孝孺黨樸言家有孝孺集未及燬
善從借觀密奏之樸以是誅死而善得復官于謙王文
之戮陳循之竄善亦有力焉子宗襲爵後革奪門功降
金吾指揮使孫增尚公主李實字孟誠合州人正統七
年進士爲人恣肆無拘檢有口辨景泰初爲禮部給事
中也先令完者脫歡議和實請行擢禮部右侍郎以往

少卿羅綺爲副至則見上皇頗得也先要領還言也先請和無他意及楊善往上皇果還是年十月進右都御史巡撫湖廣五年召還掌院事初實使謁上皇請還京引咎自責失上皇意後以居鄉暴橫斥爲民趙榮字孟仁其先西域人元時入中國家閩縣舅薩琦官翰林從入都以能書授中書舍人正統十四年十月也先擁上皇至大同知府霍瑄謁見慟哭而返也先遂犯京師奉上皇登土城邀大臣出迓榮慨然請行大學士高穀拊其背曰子忠義人也解所佩犀帶贈之卽擢大理右少卿充鴻臚卿偕右通政王復出城朝見進羊酒諸物也

先以非大臣遣之還而邀于謙石亨王直胡濙出景帝不遣改榮太常少卿仍供事內閣景泰元年七月擢工部右侍郎偕楊善等往敕書無奉迎語善口辯榮左右之竟奉上皇歸進左侍郎行人王宴請開沁河通漕運再下廷議言不便遣榮往勘還亦言不便尋奉敕會山東河南三司相度河道衆以榮不由科目慢之榮怒多所撻辱又自攝衣探水深淺三司各上章言榮單馬馳走驚駭軍民杖傷縣官鬻廩米多取其直撫按薛希璉張琛亦以聞章下治河僉都御史徐有貞覈奏法司言榮雖失大體終爲急於國事鬻米從人所爲諸臣侮大

臣抗敕旨宜逮治希璉琛亦宜罪帝令按臣責取諸臣
供狀宥之天順元年進尚書曹欽反榮策馬大呼於市
曰曹賊作逆壯士同我討罪果有至者卽率之往賊平
英宗與李賢言歎榮忠命兼大理寺卿食其俸七年以
疾罷成化十一年卒賜恤如制霍瑄字廷璧鳳翔人由
鄉舉入國學授大同通判正統十二年以武進伯朱冕
薦就擢知府也先擁英宗至城下瑄與理餽侍郎沈固
等出謁叩馬號泣衆露刃叱之不爲動上皇命括城內
金帛瑄悉所有獻之上皇嘉歎寇數出沒大同渾源伺
軍民樵採輒驅掠或幸脫歸率殘傷肢體遺民相率入

城無所棲又乏食瑄俱爲奏之老弱聽暫徙發粟振而
所留城守丁壯除賦役秩滿當遷鎮巡諸臣乞留詔加
山西右叅政仍治府事英宗復位徵拜瑄工部右侍郎
而固亦以石亨薦起爲戶部尚書既而巡撫上瑄治行
賜誥旌異初瑄在大同巡撫年富被逮瑄資其家還里
爲鎮守太監韋力轉所惡撻之十餘至是瑄以聞且言
力轉每宴輒用妓樂服御僭侈如王者強取部民女爲
妾力轉亦許瑄違法事帝兩釋焉其年轉左賜二品服
成化初屢爲言官所劾命致仕卒於京師瑄初治郡有
聲晚節不檢特以艱危時見知天子遂久列顯位沈固

丹陽人永樂中起家鄉舉積官至尚書石亨敗乞休去
王越字世昌濬人長身多力善射涉書史有大畧登景
泰二年進士廷試日旋風起颺其卷去更給卷乃畢事
授御史出按陝西聞父訃不俟代輒歸爲都御史所劾
帝特原之天順初起掌諸道章奏超拜山東按察使七
年大同巡撫都御史韓雍召還帝難其代喟然曰安得
如雍者而任之李賢薦越召見越偉服短袂進止便利
帝喜擢右副都御史以行甫至遭母憂奪情視事越乃
繕器甲簡卒伍修堡砦減課勸商爲經久計成化三年
撫寧侯朱永征毛里孩以越贊理軍務其秋兼巡撫宣

府五年冬寇入河套延綏巡撫王銳請濟師詔越帥師
赴之河套者周朔方秦河南地土沃豐水草東距山西
偏頭關西距寧夏可二千里三面阻河北拊榆林之背
唐三受降城在河外故內地明初阻河爲守延綏亦無
事自天順間毛里孩等三部始入爲寇然時出沒不敢
久駐至是始屯牧其中屢爲邊患越至榆林遣遊擊將
軍許寧出西路龍州鎮靖諸堡范瑾出東路神木鎮羌
諸堡而自與中官秦剛按榆林城爲聲援寧戰黎家澗
瑾戰崖窰川皆捷右叅將神英又破敵於鎮羌寇乃退
明年正月以捷聞越引還抵偏頭關延綏告警兵部劾

越擅還詔弗罪而令越屯延綏近地爲援寇萬餘騎五
路入掠越令寧等擊退之進右副都御史是年三月朝
廷以阿羅出等擾邊不止拜撫寧侯朱永爲將軍與越
共圖之破敵開荒川諸將追奔至牛家寨阿羅出中流
矢走論功進右都御史又明年越以方西征辭大同巡
撫詔聽之加總督軍務專辦西事然是時寇數萬而官
軍堪戰者僅萬人又分散防守勢不敵永越乃條上戰
守二策尚書白圭亦難之請敕諸將守其年寇復連入
懷遠諸堡永越禦却之圭復請大舉搜套明年遣侍郎
葉盛至軍議時永已召還越以士卒衣裝盡壞馬死過

半請且休兵與盛偕還而廷議以套不滅三邊終無寧
歲先所調諸軍已踰八萬將權不一迄無成功宜專遣
大將調度乃拜武靖伯趙輔爲平虜將軍敕陝西寧夏
延綏三鎮兵皆受節制越總督軍務比至寇方深入環
慶固原飽掠軍竟無功越輔以滿都魯等羅忽亂加思
蘭方強盛勢未可破乃奏言欲窮搜河套非調精兵十
五萬不可今餽餉煩勞公私困竭重加科斂內憂可虞
宜姑事退守散遣士馬量留精銳就糧卹延沿邊軍民
悉令內徙其寇所出沒之所多置烽燧鑿塹築牆以爲
保障奏上廷議不決越等又奏寇知我軍大集移營近

河潛謀北渡殆不戰自屈但山陝荒旱芻糧缺供邊地
早寒凍餒相繼以時度之攻取實難請從防守之策臣
等亦暫還朝於是部科諸臣劾越輔欺謾會輔有疾召
還以寧晉伯劉聚代明年越與聚敗寇漫天嶺進左都
御史是時三遣大將皆以越總督軍務寇每入小擊輒
去軍罷卽復來率一歲數入將士益玩寇而寇勢轉熾
其年九月滿都魯及孛羅忽亂加恩蘭留妻子老弱於
紅鹽池大舉深入直抵秦州安定諸州縣越策寇盡銳
西不備東偏乃率延綏總兵官許寧遊擊將軍周玉各
將五千騎爲左右哨出榆林踰紅兒山涉白鹽灘兩晝

夜行八百里將至暴風起塵翳日一老卒前曰天贊我
也去而風使敵不覺還軍遇歸寇處下風乘風擊之莫
不勝矣越遽下馬拜之擢爲千戶分兵千爲十覆而身
率寧玉張兩翼薄其營大破之禽斬三百五十獲駝馬
器械無算焚其廬帳而還及滿都魯等飽掠歸則妻子
畜產已蕩盡相顧痛哭自是遠徙北去不敢復居河套
西陲息肩者數年初文臣視師者率從大軍後出號令
行賞罰而已越始多選跳盪士爲腹心將親與寇搏又
以間覘敵累重邀劫之或剪其零騎用是數有功十年
春廷議設總制府於固原舉定西侯蔣璉爲總兵官越

提督軍務控制延綏寧夏甘肅三邊總兵巡撫而下竝聽節制詔罷琬卽以越任之三邊設總制自此始論功加太子少保增俸一級紀功郎中張謹兵科給事中郭鏜等論劉聚等濫殺冒功并劾越妄奏越方自以功大賞薄遂怏怏稱疾還朝明年與左都御史李賓同掌院事兼督十二團營越素以才自喜不修小節爲朝議所齟至是乃破名儉與羣小關通奸人韋英者以官奴從征延綏冒功得百戶汪直嘗西廠用事英爲爪牙越因英自結於直內閣論罷西廠越遇大學士劉吉劉珏於朝顯謂之曰汪直行事亦甚公如黃賜專權納賂非直不能去商萬在事久是非多有所忌憚二公入閣幾日何亦爲此珏曰吾輩所言非爲身謀使直行事皆公朝廷置公卿大夫何爲越不能對兵部尚書項忠罷越當遷而朝命予陝西巡撫余子俊越彌不平請解營務優詔不許因自陳搗巢功爲故尚書白圭所抑從征將士多未錄乞移所加官酬之子俊亦言越賞不酬功乃進兵部尚書仍掌院事尋加太子太保越急功名汪直初東征越望督師爲陳鉞所沮鉞驟寵心益艷之十六年春延綏守臣奏寇潛渡河入靖虜越乃說直出師詔拜保國公朱永爲平虜將軍直監軍而越提督軍務越說

直令永率大軍由南路已與直將輕騎循塞垣而西俱會榆林越至大同聞敵帳在威寧海子則盡選宣大兩鎮兵二萬出孤店潛行至貓兒莊分數道值大風雨雪晦冥進至威寧寇猶不覺掩擊大破之斬首四百三十餘級獲馬駝牛羊六千師不至榆林而還永所出道迂不見敵無功由是封越威寧伯世襲歲祿千二百石越受封不當復領都察院而越不欲就西班御史許進等頌其功引王驥楊善例請仍領院事提督團營從之明年復與直永帥師出大同適寇入掠追擊至黑石崖禽斬百二十餘人獲馬七百匹進太子太傅增歲祿四百石明石明制文臣不得封公侯越從勲臣刻改掌前軍都督府總五軍營兵督團營如故自是真爲武人且望侯矣其年五月宣府告警命佩平胡將軍印充總兵官復以直監督軍務率京軍萬人赴之比至寇已去因留屯其地至冬而直爲其儕所間寵衰越等再請班師不許陳鉞居兵部亦代直請帝切責之兩人始懼已大同總兵官孫鉞卒卽命越代之而以直總鎮大同宣府悉召京營將士還明年寇犯延綏越等調兵援之頗有斬獲益祿五十石帝是時益知越直交結狀大學士萬安等以越有智計恐誘直復進乃請調越延綏以離之兩人勢

益衰明年直得罪言官并劾越詔奪爵除名謫居安陸
三子以功廢得官者皆削籍且使使齎敕諭之越聞使
至欲自我見赦有從輕詔乃稍自安越既爲禮法士所
疾自負豪傑鶩然自如飲食供奉擬王者射獵聲樂自
恣雖謫徙不少衰故其得罪時議頗謂太過而竟無自
之者孝宗立赦還弘治七年越屢疏訟冤詔復左都御
史致仕越年七十耄矣復結中官李廣以中旨召掌都
察院事給事中季源御史王一言等交章論乃寢十年
冬寇犯甘肅廷議復設總制官先後會舉七人不稱旨
吏部尚書屠滹以越名上乃詔起原官加太子太保總
制甘涼邊務兼巡撫越言甘鎮兵弱非籍延寧兩鎮兵
難以克敵請兼制兩鎮解巡撫事從之明年越以寇巢
賀蘭山後數擾邊乃分兵三路進剿斬四十三級獲馬
駝百餘加少保兼太子太傅遂條上制置哈密事宜會
李廣得罪死言官連章劾廣黨皆及越越聞憂恨其冬
卒於甘州贈太傅諡襄敏越姿表奇偉議論鸚舉久歷
邊陲身經十餘戰知敵情僞及將士勇怯出奇制勝動
有成算獎拔士類籠罩豪俊用財若流水以故人樂爲
用又嘗薦楊守隨佾鍾屠滹輩皆有名於世睦族敦舊
振窮卹貧如恐不及其膽智過絕於人嘗與朱永帥千

人巡邊寇猝至永欲走越止之列陣自固寇疑未敢前
薄暮令騎皆下馬銜枚魚貫行自率驍勇爲殿從山後
行五十里抵城謂永曰我一動寇追擊無噍類矣示暇
以惑之也下馬行無軍聲令寇不覺耳性故豪縱嘗西
行謁秦王王開筵奏妓越語王下官爲王吠犬久矣寧
無以相酬者因盡乞其妓女以歸一夕大雪方圍爐飲
諸妓擁琵琶侍一小校訓敵還陳敵情未竟越大喜酌
金卮飲之命彈琵琶侑酒卽以金卮賜之語畢益喜指
妓絕麗者曰之曰若得此何如校皇恐謝越大笑立于
之校所至爲盡死力越在時人多咎其貪功及死而將

餒卒情冒功糜餉滋甚邊臣竟未有如越者

贊曰人非有才之難而善用其才之難王驥王越之將
兵揚善之奉使徐有貞之治河其才皆有過人者假使
隨流平進以幹畧自奮不失爲名卿大夫而顧以躁於
進取依附攀援雖剖符受封在文臣爲希世之遇而譽
望因之隳損甚亦不免削奪名節所繫可不重哉

明史卷一百七十一終

明史卷一百七十一
列傳第六十
總裁官總理事務 經筵講官少保兼李太保和殿大學士兼管吏部戶部尚書事加六級張廷璽奉
敕修

明史卷一百七十二

列傳第六十

羅亨信

楊寧

孫原貞

楊信民

馬謹

白圭

孔鏞

侯璉

王來

朱鑑

張驥

程信

張瓚

鄧廷瓚

總裁官總理事務 經筵講官少保兼李太保和殿大學士兼管吏部戶部尚書事加六級張廷璽奉

孫 需 憲

張 驥 王 晟 鄧 顯 耿 定

子 鉞

謝 士 元

王 軾

劉 丙

羅亨信字用實東莞人永樂二年進士改庶吉士授工
科給事中出視浙江水災奏蠲三縣租進吏科右給事
中坐累謫交趾爲吏居九年仁宗嗣位始召入爲御史
覈通州倉儲巡按畿內清軍山西皆有聲宣德中有薦
其堪方面者命食按察僉事俸待遷英宗卽位之三月
擢右僉都御史練兵平涼西寧正統二年蔣貴討阿台
朶兒只伯亨信叅其軍務至魚兒海貴等以芻餉不繼
留十日引還亨信讓之曰公等受國厚恩敢臨敵退縮
耶死法孰與死敵貴不從亨信上章言貴逗遛狀帝以

其章示監督尚書王驥等明年進兵大破之亨信以叅
贊功進秩一等父喪歸葬還朝改命巡撫宣府大同叅
將石亨請簡大同民三之一爲軍亨信奏止之十年進
右副都御史巡撫如故時遣官度二鎮軍田一軍八十
畝外悉徵稅五升亨信言文皇帝時詔邊軍盡力墾田
毋徵稅陛下復申命之今奈何忽爲此舉塞上諸軍防
邊勞苦無他生業惟事田作每歲自冬徂春迎送瓦剌
使臣三月始得就田七月又復刈草八月以後修治關
塞計一歲中曾無休暇况邊地磽瘠霜早收薄若更徵
稅則民不復畊必致竄逸計臣但務積粟不知人心不

固雖有粟將誰與守帝納其言而止初亨信嘗奏言也
先專候豐端以圖入寇宜預於直北要害增置城衛爲
備不然恐貽大患兵部議寢不行及土木之變人情洶
懼有議棄宣府城者官吏軍民紛然爭出亨信仗劍坐
城下令曰出城者斬又誓諸將爲朝廷死守人心始定
也先挾上皇至城南傳命啟門亨信登城語曰奉命守
城不敢擅啟也先遂巡引去赤城鵬鶚懷來永寧保安
諸守將棄城遁竝按其罪當是時車駕旣北寇騎日薄
城下關門左右皆戰場亨信與總兵楊洪以孤城當其
衝外禦強寇內屏京師洪旣入衛又與朱謙共守勞績

甚著著輿鑿處顛髮盡秃景帝卽位進左副都御史明年七十有四矣乞致仕許之歸八年卒於家

侯璉字廷玉澤州人少慷慨有志節登宣德二年進士授行人烏撒烏蒙土官以爭地相讐殺詔遣璉及同官章聰諭解之正其疆理而還副侍郎章敞使交趾關門卑前驅偃而入璉叱曰此狗竇耳奈何辱天使交人爲毀關乃入及歸餽遺無所受遷兵部主事正統初從尚書柴車等出鐵門關禦阿台有功進郎中從王驥征麓川至金齒驥自統大軍擊思任發而遣璉援大侯州賊衆二萬至督都指揮馬讓盧鉞擊走之遂由高黎貢山

兼程夜行會大軍壓其巢麓川平拜禮部右侍郎叅贊
雲南軍務詔與楊寧二年更代驥再征麓川璡以功遷
左九年代還母憂起復尋調兵部十一年復代寧鎮雲
南思機發竄孟養驥復南征璡與都督張軌分兵進抵
金沙江破之鬼哭山璡書褒賚景泰初貴州苗韋同烈
叛圍新添平越清平興隆諸衛命璡總督貴州軍務討
之時副總兵田禮已解新添平越圍璡遂遣兵攻敗都
盧水西諸賊貴州道始通又調雲南兵由烏撒會師開
畢節諸路檄普安土兵援安南衛而自率師攻紫塘彌
勒等十餘寨會賊復圍平越回師擊退之遂分哨七盤

坡羊腸河楊老堡解清平圍東至重安江與驥兵會興
隆抵鎮遠道皆通捷聞進兵部尚書進克賞改苗酋其
渠王阿同等三十四人別賊阿趙偽稱趙王率衆掠清
平璡復討禽之水西苗阿忽等六族皆自乞歸化詔璡
隨方處置景泰元年八月以勞瘁卒於普定年五十三
賜祭葬廕其子錦衣衛世襲千戶附錄
楊寧字彥謐歙人宣德五年進士授刑部主事機警多
才能負時譽正統初從尚書魏源巡視宣大四年與都
督吳亮征麓川賊欵軍門約降寧曰兵未加而先降誘
我也宜嚴兵待之不聽令寧督運金齒已而賊果大至

明史卷一百三十三 列傳四
官兵敗績諸將獲罪寧擢郎中復從王驥至騰衝破賊
寧與太僕少卿李蕡督戰竝有功師還寧超拜刑部右
侍郎遭母憂奪情九年代侯璉參贊雲南軍務時麓川
甫平寧以騰衝地要害與都督沐昂築城置衛設戍兵
控諸蠻邊方遂定居二年召還聞浙盜起命寧鎮江西
賊至輒擊敗之暇則詢民疾苦境內嚮服景泰初召拜
禮部尚書偕胡濙理部事迤北可汗遣使入貢寧言宜
留使數日宴勞賜予視也先使倍厚彼性多猜二人必
內構邊患可緩帝務誠信不許其冬以足疾調南刑部
七年爲御史莊昇所劾遣覈未報寧力詆言官都察院

寧脅制言路詔免其罪錄狀示之英宗復辟命致
仕踰年卒寧有才而善交權貴嘗自敘前後戰功乞世
廕子堦方一歲遂得新安衛副千戶

王來字原之慈谿人宣德二年以會試乙榜授新建教
諭寧王府以諸生充樂舞來請易以道士諸王府設樂
舞生始此六年以薦擢御史出按蘇松常鎮四府命偕
巡撫周忱考察屬吏敕有請自上裁語來言賊民吏去
之惟恐不速必請而後行民困多矣帝爲改敕賜之中
官陳武以太后命使江南橫甚來數抑之武還愬於帝
帝問都御史顧佐巡按誰也佐以來對帝歎息稱其賢

日識之及報命獎諭甚至英宗卽位以楊士奇薦擢山西左叅政言流民所在成家及招還故土每以失產復逃去乞請隨在附籍便又言郡縣官不以農業爲務致民多游惰催徵輒致已命朝廷憫其失業下詔蠲除而田日荒閒租稅無出累及良民宜擇守長賢者以課農爲職其荒田令附近之家通力合作供程之外聽其均分原主復業則還之蠶桑可裨本業者聽其規畫仍令提學風憲官督之庶人知務本從之來居官廉練達政事侍郎于謙撫山西亟稱其才可置地侍而來執法嚴疾惡尤甚以公事杖死縣令不職者十人逮下獄當徒

遇赦以原官調補廣東來自此始折節爲和平而政亦修舉正統十三年遷河南左布政使明年改左副都御史巡撫河南及湖廣襄陽諸府也先逼京師來督兵勤王渡河聞寇退乃引還景泰元年貴州苗叛總督湖廣貴州軍務侯璉卒於軍進來右都御史代之與保定伯梁瑤都督毛勝方瑛會兵進討至靖州賊掠長沙寶慶武岡來等分道邀擊俘斬三千餘人賊遁去已復出掠官軍連戰皆捷賊魁韋同烈據興隆劫平越清平諸衛來與方瑛擊敗之賊退保香爐山出陡絕勝瑛與都督陳友三道進來與瑤大軍繼之先後破三百餘寨會師

香爐山下發礮轟崖石聲動地賊懼縛同烈并賊將五十八人降餘悉解散遂移軍清平巨檄四川兵共勦都勻草塘諸賊賊望風具牛酒迎降賊平班師詔留來瑤鎮撫尋命來兼巡撫貴州奏言近因黔楚用兵暫行警爵之例今寇賊稍寧惟平越都勻等四衛乏餉宜召商中鹽罷納米例從之三年十月召還加兼大理寺卿瑤以來功大乞加旌異都給事中蘇霖駁之乃止來還在道以貴州苗復反救回師進討明年事平召爲南京工部尚書英宗復辟六尚書悉罷來歸成化六年卒於家孫原貞名瑀以字行德興人永樂十三年進士授禮部

王事歷郎中英宗初用薦擢河南右叅政居官清慎有吏才正統八年大臣會薦遷浙江左布政使久之盜大起閩浙間赦而再叛景帝卽位發兵討之原貞嘗策賊必叛上方畧請爲備至是卽命原貞叅議軍事深入禽其魁而溫州餘賊猶未滅命都指揮李信爲都督僉事調軍討之遂拜原貞兵部左侍郎參信軍務鎮守浙江丁母憂當去副都御史軒輓請留之報可景泰元年原貞進兵搗賊巢俘斬賊首陶得二等招撫三千六百餘人追還被掠男女捷聞璽書獎勵請奔喪踰月還鎮復分兵勦平餘寇奏析瑞安地增置泰順析麗水青田二

縣地置雲和宣平景寧四邑建官置戍盜患遂息論功
進秩一等浙官田賦重右布政使楊瓚請均於民田輕
額者詔原貞督之田賦以平三年請褒贈禦賊死事武
臣指揮同知脫綱王瑛都指揮僉事沈麟崔源皆得贈
卹六月進兵部尚書鎮守如故未幾命考察福建庶官
因留鎮焉福州建寧二府舊有銀冶因寇亂罷朝議復
開原貞執不可乃寢五年冬疏言四方屯軍率以營繕
轉輸諸役妨耕作宜簡精銳實伍餘悉歸之農苟增萬
人屯卽歲省支倉糧十二萬石且積餘糧六萬石兵食
豈有不足哉今歲漕數百萬石道路費不貲如浙江糧

軍兌運米石加耗米七斗民自運米石加八斗其餘計
水程遠近加耗是田不加多而賦斂實倍欲民無困不
可得也況今太倉無十數年之積脫遇水旱其何以濟
宜量入爲出汰冗食浮費俟倉儲旣裕漸減歲漕數而
民困可蘇也臣昔官河南稽諸逃民籍凡二十餘萬戶
悉轉徙南陽唐鄧襄樊間群聚謀生安保其不爲盜宜
及今年豐遣近臣循行督有司籍爲編戶給田業課農
桑立社學鄉約義倉使敦本務業生計旣定徐議賦役
庶無他日患時不能盡用後劉千斤之亂果如原貞所
料已復鎮浙江英宗復位罷歸成化十年卒年八十七

原貞所至有勞績在浙江尤著名孫需字孚吉成化八年進士爲常州府推官疑獄立剖擢南京御史劾僧繼曉忤旨予杖出爲四川副使弘治中累官右副都御史巡撫河南歲凶募民築汴河堤堤成而饑者亦濟鎮守中官劉瑯貪橫奸民赴瑯訟者需以法論之遣戍瑯爲跪請執不聽瑯恨次骨大臣子橫干鄉需抑之瑯與謀改需撫陝西尋改撫鄖陽安輯流民占籍者九萬餘戶正德元年召爲南京兵部右侍郎四年就拜禮部尚書未兩月劉瑾惡之追論撫河南時事罰米輸邊廷推需刑部尚書中旨令致仕瑾誅起南京工部尚書就改刑部再改吏部十三年乞休去嘉靖初卒諡清簡張憲字廷式與需同里同舉進士相代爲尚書嘗爲浙江右布政使後以工部右侍郎督易州山廠公帑無毫髮私歷南京禮部尚書劉瑾勒致仕瑾誅起工部卒

朱鑑字用明晉江人童時割股療父疾舉鄉試授蒲圻教諭宣德二年與廬陵知縣孔文英等四十三人以顧佐薦召於各道觀政三月遂擢御史巡按湖廣諭降梅花峒賊蕭啟寧等請復舊制同副使僉事按行所部問民疾苦湖湘俗男女婚嫁多踰三十鑑申明禮制其俗遂變三載代歸正統五年復按廣東奏設欽州守備都

指揮奉命錄囚多所平反招撫逋叛甚衆還朝請天下
按察司增僉事一人專理屯田遂爲定制七年用薦擢
山西左參政奏減平陽採薪供邊夫役景帝監國進布
政使尋擢右副都御史巡撫其地上言也先奸詭百端
殺掠無已復假和親遣使覘伺以送駕爲名覲得開關
延接稍示抗拒彼卽有辭其謀旣深我慮宜遠宜暫罷
中貴監軍之制假總兵以生殺權使志無所撓計有所
施整散兵募勇士重懸賞格鼓勵義旅徵勤王兵數道
竝進戮力復讐庶大駕可還敵兵自退曩者江南寇發
皆以誅王振爲名夫事歸朝廷則治歸宦官則亂昔高

皇帝與羣臣議事必屏去左右恐泄事機乞杜權倖之
門凡軍國重事屬任大臣必當有濟景帝嘉納之時瓦
刺窺塞下鑑日夜爲守禦計景泰元年敵數萬騎攻雁
門都指揮李端擊却之尋犯河曲及義井堡殺二指揮
圍忻代諸州石亨等不能禦長驅抵太原城北山西大
震命鑑移鎮雁門而別遣都督僉事王良鎮太原援兵
漸集敵亦饜乃引去時山西仍遣兵荒鑑外飭戎備內
撫災民勞瘁備至二年十月鎮守山西都御史羅通召
還命鑑兼領其事明年詔遣大臣行天下黜陟有司禮
部侍郎鄒幹至山西多所論劾鑑請召幹還幹因極論

鑑徇護帝是幹言其年十月召鑑佐院事至京致仕去
初景帝易儲鑑貽大學士陳循書言不可且曰陛下於
上皇當避位以全大義循大駭英宗復位鑑詣闕上表
賀帝曰鑑老疾何妄來其速令還家居二十餘年卒
楊信民名誠以字行浙江新昌人鄉舉入國學宣德時
除工科給事中母憂歸營墓土石必躬舁數百步曰吾
墓吾母而專役他人吾不安也服闋改刑科正統中清
軍江西還奏民隱五事多議行尋以王直薦擢廣東左
參議清操絕俗嘗行田野訪利弊爲更置性剛負氣按
察使郭智不法信民劾之下獄黃翰代智信民復發其
奸已又劾僉事韋廣廣遂訐信民因與翰俱被逮軍民
譁然詣闕下乞留信民詔復信民官而翰廣鞫實除名
景帝監國于謙薦之命守備白羊口會廣東賊黃蕭養
圍廣州急嶺南人乞信民乃以爲右僉都御史巡撫其
地士民聞而相慶曰楊公來矣時廣州被圍久將士戰
輒敗禁民出入樵采絕而鄉民避賊來者拒不納多爲
賊所害民益愁苦歸賊信民至開城門發倉廩刻木鏤
給民得出入賊見木鏤曰此楊公所給也不敢傷避賊
者悉收保民若更生信民益厲甲兵多方招撫降者日
至乃使使持檄入賊營諭以恩信蕭養曰得楊公一言

死不恨尅日請見信民單車詣之隔濠與語賊黨望見
謹曰果楊公也爭羅拜有泣下者賊以大魚獻信民受
之不疑蕭養且降而都督董興大軍至賊忽中變夜有
大星隕城外七日而信民暴疾卒時景泰元年三月乙
卯也軍民聚哭城中皆縞素賊聞之亦泣曰楊公死吾
屬無歸路矣未幾興平賊所過村聚多殺掠民仰天號
曰楊公在豈使吾曹至是計聞賜葬祭錄其子玖爲國
子生廣東民赴京請建祠許之成化中賜諡恭惠久之
從選人盧從愿請命有司歲以其忌日祭焉

張驥字仲德安化人永樂中舉於鄉入國學宣德初授

御史出按江西慮囚福建有仁廉聲正統八年吏部尚
書王直等應詔博舉廷臣公廉有學行者驥與焉遷大
理右寺丞巡撫山東先是濟南設撫民官專撫流民後
反爲民擾驥奏罷之俗遇旱輒伐新葬塚墓殘其肢體
以爲旱所由致名曰打旱骨椿以驥言禁絕還朝進右
少卿已命巡視濟寧至淮揚饑民驥立法捕蝗停不急
務蠲逋發廩民賴以濟十三年冬巡撫浙江初慶元人
葉宗留與麗水陳鑑胡聚衆盜福建寶豐諸銀礦已而
羣盜自相殺遂爲亂九年七月福建參議竺淵往捕被
執死宗留僭稱王時福建鄧茂七亦聚衆反勢甚張宗

留鑑胡附之流剽浙江江西福建境上參議耿定僉事
王晟及都督僉事陳榮指揮劉真都指揮吳剛龔禮永
豐知縣鄧顥前後敗歿遂昌賊蘇牙俞伯通剽蘭溪又
與相應遠近震動驥至遣金華知府石瑁擊斬牙等撫
定其餘黨而鑑胡方以爭忿殺宗留專其衆自稱大王
國號太平建元泰定僞署將帥圍處州分掠武義松陽
龍泉永康義烏東陽浦江諸縣未幾茂七死鑑胡勢孤
驥命麗水丞丁寧率老人于世昌等齎榜入賊巢招之
鑑胡遂偕其黨出降惟陶得一不就撫殺使者入山爲
亂如故時十四年四月也驥既招降鑑胡而別賊蘇龍

養等掠金華亦爲官軍所獲賊勢乃益衰其秋景帝嗣
位召驥還卒於道驥所至咸有建樹山東兩浙民久而
思之鑑胡至京帝宥不誅更遇赦釋充留守衛軍也先
入犯鑑胡乘間亡被獲伏誅竺淵奉化人耿定和州人
王晟鄆城人鄧顥梁昌人俱進士顥兵潰被執不屈死
詔爲營葬淵等贈官錄一子
馬謹字守禮新樂人宣德二年進士事父母孝遭喪親
負土以葬正統中以御史按浙江時修備倭海船徵材
于嚴衢諸郡謹恐軍士藉勢肆斬伐請禁飭之報可所
至貪猾屏跡疏振台處寧紹四府饑吏部驗封郎中缺

人久帝令推擇會謹九載滿尚書郭璉薦謹廉直遂用
之十年薦擢湖廣右布政使正統末湖南叛苗掠靖州
命謹同御史侯爵撫諭參將張善率兵繼之謹等至招
數千人復業其出掠者擊敗之尋與善破淇溪諸寨景
泰初復與善大破臘婆諸洞已同參將李震擊破青龍
渡馬楊山諸賊追奔至雞心嶺先後斬首千四百有奇
師還靖州賊復出掠搗其巢斬獲如前武岡城溪諸賊
結廣西蠻據青肺山復與震攻破之獲賊楊光拳等五
百六十人斬首倍之扶城諸砦聞風欵附謹出入行間
三歲衝冒鋒鏑與諸將同而運籌轉餉功尤多轉左布

政使錄功進秩一等六年五月遷右副都御史仍支二
品俸巡撫河南撫流民三萬一千餘戶天順初廢巡撫
官謹亦罷歸久之卒謹性廉介楊士奇嘗稱爲冰霜鐵

石

程信字彥實其先休寧人洪武中戍河間因家焉信舉
正統七年進士授吏科給事中景帝卽位薦起薛瑄等
三人也先犯京師信督軍守西城上言五事都督孫鏜
擊也先失利欲入城信不納督軍從城上發箭礮助之
鏜戰益力也先遂却景泰元年請振畿輔饑民復河間
學官生徒因用兵罷遣者皆報可進左給事中以天變

上中與固本十事其言敬天則請帝敦孝友之實以答天心帝嘉納之明年二月出爲山東右參政督餉遼東巡撫寇深奏盜糧一石以上者死又置新斛視舊加大屬信鈎考信立碎之曰奈何納人於死深由是不悅信尋以憂去服闋起四川參政理松潘餉偕侍郎羅綺破黑虎諸寨天順元年信入賀特方錄景泰間進言者特擢信太僕卿京衛馬舊多耗信定期徵之三營大將石亨孫鏜曹欽竝以奪門功有寵庇諸武臣爲言太僕苛急請改隸兵部信言高皇帝令太僕馬數勿使人知若隸兵部馬登耗太僕不得聞脫有警馬不給誰任其咎

帝是之乃隸太僕如故明年改左僉都御史巡撫遼東都指揮夏霖恣不法僉事胡鼎發其四十罪信以聞下霖錦衣獄門達言信不當代奏帝責令陳狀時寇深方掌都察院修前劾信徵下詔獄降南京太僕少卿五年召爲刑部右侍郎母憂歸成化元年起兵部尋轉左四川戎縣山都掌蠻數叛陷合江等九縣廷議發大軍討之以襄城伯李瑾充總兵官太監劉恒爲監督進信尚書提督軍務至永寧分道進都督芮成由戎縣巡撫貴州都御史陳宜參將吳經由芒部都指揮崔旻由普市冰腦南寧伯毛榮由李子關巡撫四川都御史汪浩

明史卷一百七十二 列傳 十五
參將宰用由渡船鋪左右遊擊將軍羅秉忠穆義由金
鵝池而信與瑾居中節制轉戰六日破龍背豹尾諸寨
七百五十餘明年至大壩焚寨千四百五十前後斬首
四千五百有奇俘獲無算按諸九姓不奉化者遷瀘州
衛於渡船鋪增置關堡改大壩爲太平川長官司分山
都掌地設官建治控制之帝降璽書嘉勞錄功進兼大
理寺卿與白圭同涖兵部言官劾信上首功不實信四
疏乞休不許信欲有爲而阻於圭不自得數稱疾六年
春旱應詔言兵事宜更張者四兵弊宜申理者五大畧
言延綏兩廣歲遭劫掠宜擇大臣總制四方流民多聚

荆襄宜早區畫京軍操練無法功次陞賞未當語多侵
圭圭奏寢之改南京兵部參贊機務明年致仕踰年卒
贈太子少保諡襄毅信有才力識大體征南蠻時制許
便宜從事迄班師未嘗擅賞戮一人曰刑賞人主大柄
也不得已而假之人幸而事集輒自專非人臣所宜在
南京守備臣欲預錢穀訟獄事信曰守備重臣所以謹
非常也若此乃有司職耳論者韙之子敏政見文苑傳
白圭字宗玉南宮人正統七年進士除御史監朱勇軍
討兀良哈有功巡按山西辨疑獄百餘從車駕北征陷
土木脫還景帝命往澤州募兵尋遷陝西按察副使擢

浙江右布政使福建賊鄭懷冒流剽處州協諸將平之
天順二年貴州東苗干把豬等僭號攻劫都勻諸處詔
進右副都御史贊南和侯方瑛軍往討圭以谷種諸夷
爲東苗羽翼先勦破百四十七砦遂會兵青崖復破四
百七十餘砦乘勝攻六美山干把豬就擒諸苗震讐湖
廣災就命圭巡撫四年召爲兵部右侍郎明年孛來寇
莊浪圭與都御史王竑贊都督馮宗軍務分兵巡邊圭
敗之固原州七年進工部尚書成化元年荆襄賊劉千
斤等作亂敕撫寧伯朱永爲總兵官都督喜信鮑政爲
左右參將中官唐慎林貴奉監之而以圭提督軍務發

京軍及諸道兵會討千斤名通河南西華人縣門石狻
猊重千斤通隻手舉之因以爲號正統中流民聚荆襄
間通竄入爲妖言潛謀倡亂石龍者號石和尚聚衆剽
掠通與其起兵僞稱漢王建元德勝流民從者四萬人
圭等至南漳賊迎戰敗之乘勝逼其巢通奔壽陽謀走
陝西圭遣兵扼其道通乃退保大市與苗龍合官軍又
破之雁坪斬通子聰及其黨苗虎等賊退保後巖山據
險下木石如雨諸軍四面攻圭往來督戰士皆蟻附登
賊大敗擒通及其衆三千五百餘人獲賊子女萬一千
有奇焚其廬舍夷險阻而還石龍與其黨劉長子等逸

去轉掠四川連陷巫山大昌圭等分兵蹙之長子縛龍
以降餘寇悉平錄功加圭太子少保增俸一級遭父憂
葬畢視事三年改兵部尚書兼督十二團營六年阿羅
出等駐牧河套陝西數被寇圭言鎮巡官偷肆宜治延
綏巡撫王銳鎮守太監秦剛總兵官房能俱獲罪去圭
乃議大舉搜河套發京兵及他鎮兵十萬屯延綏而以
輸餉責河南山西陝西民不給則預徵明年賦於是內
地騷然而前後所遣三大將朱永趙輔劉聚皆畏怯不
任戰卒以無功十年卒官年五十六贈少傅諡恭敏圭
性簡重公退卽閉閣臥請謁皆不得通在貴州時有憤

中官某而欲刺之者悞入圭所圭寤衾問之其人驚曰
乃吾公耶卽自刎不殊仆於地圭呼燭起視傳以善藥
遣之人服其量次子鉞字秉德進士及第授編修累官
太子少保禮部尚書習典故以詞翰稱卒贈太子太保

諡文裕

張瓚字宗器孝感人正統十三年進士授工部主事遷
郎中歷知太原寧波二府有善政成化初市舶中官福
住貪恣瓚禁戢其下住誣瓚於朝瓚遂列住罪住被責
其黨多抵法大臣會薦遷廣東參政轉浙江左布政使
十年冬以右副都御史巡撫四川播州致仕宣慰楊輝

言所屬天壩干灣溪諸寨及重安長官司爲生苗竊據
請王師進討詔瓚諭還侵地不服則征之瓚率兵討定
請設安寧宣撫司卽授輝子友爲宣撫以鎮詔可賜敕
獎勞以母老乞歸母已卒會松茂番寇邊詔起復視事
先是僉事林璧言松茂曩爲大鎮都御史寇深侍郎羅
綺嘗假便宜專制其地故有功今惟設兩參將以副使
居中調度事權輕臨敵稟令制府千里請戰謀洩機緩
未有能獲利者宜別置重臣彈壓或卽命瓚兼領專其
責成十二年七月命瓚兼督松茂安綿建昌軍務瓚至
軍審度形勢改大壩舊設副使於安綿而令副總兵堯

孫松潘參將孫嵩軍威疊爲夾攻計乘閒修河西舊
路作浮梁治月城避偏橋棧道軍獲安行轉餉無阻十
四年六月攻白草壩西坡禪定數大砦斬獲二算徇茂
州疊溪所過降附抵曲山三砦攻破之再討平白草壩
餘寇先後破滅五十二砦賊魁撒哈等皆殲他一百五
砦悉獻馬納欵諸番盡平留兵戍要害增置墩堡乃班
師帝嘉其功徵拜戶部左侍郎辭歸終制十五年起左
副都御史總督漕運兼巡撫江北諸府十八年歲大稔
疏請振濟發銀五萬兩復敕瓚移淮安倉糧分振而瓚
已卒瓚功名著西蜀其後撫蜀者如謝士元輩雖有名

不及贖惟天壩干之役或言楊輝溺愛庶民友欲官
之詐言生苗爲亂贖信而興師其功不無矯飾云謝士
元字仲仁長樂人景泰五年進士授戶部主事督通州
倉陳四弊屢與監倉宦官忤天順七年擢建昌知府地
多盜爲軍將所庇士元以他事持軍將奸發輒得民懷
券訟田宅士元叱曰僞也券今式而所訟乃二十年事
民驚服訟爲哀止考滿進從三品俸治府事如故以憂
去服闋起知廣信永豐有銀礦處州民盜發之聚數千
人將士憚其驍曠不敢勦士元勒兵趨之賊遮刺士元
傷左股裹創力戰獲其魁塞礦穴而還入覲改永平遭

喪不赴服闋擢四川右參政進右布政使弘治元年就
擢右副都御史巡撫其地土番大小娃者將煽亂士元
託行邊馳詣其地賊恐羅拜道左徐慰遣之歲大稔流
民趨就食士元振恤有方全活者數萬明年坐事下獄
事白遂致仕

孔鏞字韶文長洲人景泰五年進士知都昌縣分戶九
等以定役設倉水次便收斂民甚賴之以弟銘尚寧府
郡主改知連山猺獞出沒鄰境縣民悉竄鏞往招之民
驚走鏞炊飯民舍留錢償其直以去民乃漸知親鏞相
率還鏞慰勞振恤俾復故業教以戰守道路漸通縣治

遂復都御史葉盛征廣西以鏞從諸將妄殺者鏞輒力
爭所全活甚衆成化元年用葉盛等薦擢高州試知府
前知府劉海以徭警閉城門自護鄉民避徭至者輒不
納還爲徭所戕又疑民陰附賊輒戮之賊緣是激衆怒
爲內應城遂陷鏞至開門納來者流亡日歸城不能容
別築城東北居之附郭多暴骸民以疫死復爲義塚瘞
焉時賊屯境內者凡十餘部而其魁馮曉屯化州鄧公
長屯茅峒屢招不就鏞十日單騎從二人直抵茅峒
去城十里許道遇賊徒令還告曰我新太守也公長驟
聞新守至亟呼其黨擐甲迎及見鏞坦易無騶從氣大

沮鏞徐下馬入坐庭中公長率其徒弛甲羅拜鏞諭曰
汝曹故良民迫凍餒耳前守欲兵汝吾今奉命爲汝父
母汝我子也信我則送我歸賚汝粟帛不信則殺我卽
大軍至無遺種矣公長猶豫其黨皆感悟泣下鏞曰餒
矣當食我公長爲跪上酒饌旣食曰日且暮當止宿夜
解衣酣寢賊相顧駭服再宿而返見道旁裸而懸樹上
者纍纍詢之皆誥生也命盡釋之公長遣數十騎擁還
城中人望見皆大驚謂知府被執來給降也盡登陴鏞
止騎城外獨與羸卒入取穀帛使載歸公長益感激遂
焚其巢率黨數千人來降公長旣降諸賊次第納款惟

曉恃險不服鏞選壯士二百人乘夜抵化州曉倉皇走
匿獲其妻子以歸撫恤甚厚曉亦以五百人降已與僉
事陶魯敗賊廖婆保他賊先後來犯多敗去境內大定
上官交薦擢按察副使分巡高雷二府益招劇賊梁定
侯大六鄧辛酉等給田產分處內地爲官備他盜廣西
賊犯信宜岑溪皆擊敗之治績聞賜誥命旌異遭喪服
除改廣西猺獍聞鏞至悉遠遁十四年兵部上其功賚
銀幣尋進按察使荔浦賊來寇總督朱英以兵屬鏞擊
平之進食二品祿已遷左布政使旋以右副都御史巡
撫貴州清平苗阿溪者桀驁多智其養子阿賴尤有

力備行諸部中守臣皆納溪賂不可制鏞行部至清
平詢得溪所昵者二人遂以計擒溪磔之并討平雞背
苗郡蠻震懾鏞居官廉歷仕三十餘年皆在邊陲觸瘴
成疾乞骸骨不許弘治二年召爲工部右侍郎道卒年
六十三平樂李時敏者爲信宜知縣嘗與鏞共平猺亂
有功遷知化州粵人以孔李並稱

鄧廷瓚字宗器巴陵人景泰五年進士知淳安縣有惠
政丁母憂服除遷太僕寺丞貴州新設程番府地在萬
山中蠻獠雜居吏部難其人特擢廷瓚爲知府至則悉
心規畫城郭衢巷學校壇廟解舍以次興建榜諭諸獠

受約束政平令和巡撫陳儼上其治行帝令久任九載秩滿始遷山東左參政尋進右布政使弘治二年以右副都御史巡撫貴州廷瓚自令至守淹常調者踰三十年至是去知府止三歲遂得開府以生母憂歸服闋還原任都勻苗乜富架長脚等作亂敕廷瓚提督軍務同湖廣總兵官顧溥貴州總兵王通等討之副使吳倬遣熟苗詐降富架誘令人寇伏兵擒其父子官軍乘勝連破百餘寨生繫長脚以歸羣蠻震懼廷瓚言都勻清平舊設二衛九長官司其人皆世祿自用其法恣虐激變苗民亂四十餘年今元兇就除非大更張不可請改

為府縣設流官與土官兼治庶可久安因上善後十一事帝悉從之遂設府一曰都勻州二曰獨山麻哈縣一曰清平苗患自此漸戢論功進右都御史八年召掌南京都察院事甫數月命提督兩廣軍務兼巡撫越二年進左廷瓚治尚簡易於吏事但總大綱結羣蠻以恩信不輕用兵而兵出必成功鬱林雲鱸大桂諸蠻及四會饑民作亂以次討平兩廣遂無事十三年復召掌南院未行卒贈太子少保諡襄敏廷瓚有雅量待人不疑時多稱其長者至所設施動中機宜其在貴州平苗功為尤偉云

王軾字用敬公安人天順八年進士授大理右評事遷
右寺正錄囚四川平反百餘人擢四川副使歲凶請官
銀十萬兩爲糴費以按嘉定同知盛崇仁贓罪被訐下
吏事白還職改陝西弘治初擢四川按察使三年遷南
京右僉都御史提督操江八年進右副都御史總理南
京糧儲旋命巡撫貴州明年入爲大理卿詔與刑部裁
定條例頒天下十三年拜南京戶部尚書尋命兼左副
都御史督貴州軍務討普安賊婦米魯時鎮守中官楊
友總兵官曹愷巡撫錢鉞共發兵討魯大敗於阿馬坡
都指揮吳遠被執普安幾陷友等請濟師乃以命軾軾

未至而友等遣人招賊賊揚言欲降益擁衆攻圍普安
安南衛城斷盤江道勢愈熾又乘間劫執友右布政使
閻鉅按察使劉福都指揮李宗武郭仁史韜李雄吳達
等死焉軾至以便宜調廣西湖廣雲南四川官軍土兵
八萬人合貴州兵分八道進使致仕都督王通將一軍
十五年正月參將趙晟破六墜砦賊遁過盤江都指揮
張泰等渡江追擊指揮劉懷等遂進解安南衛圍而愷
通及都指揮李政亦各破賊砦賊還攻平夷衛及大河
扼勒諸堡都御史陳金以雲南兵禦之賊遁歸馬尾籠
寨官軍聚攻益急土官鳳英等格殺米魯餘黨遂平用

兵凡五月破賊砦千餘斬首四千八百有奇俘獲一千二百捷聞帝大喜嘉勞召還京賜賚有加錄功加太子少保已改南京兵部參贊機務連乞致仕不允武宗立遇疾復請詔加太子太保賜救乘傳歸卒贈太保諡襄簡

劉丙字文煥南雄知府實孫也成化末登進士選庶吉士改御史巡按雲南雲南諸司吏舊不得給由父滿子代丙請如例考入官流戍僉發必經兵部多淹延致死丙請屬之撫按上官無後者請錄其弟姪勿令妻妾冒冠服俱著爲例後督兩淮鹽課中官請引二萬爲織造

費部議許之丙執不可得減四之二歷福建四川副使俱督學校三遷四川左布政使正德六年以右副都御史巡撫湖廣所部鎮溪千戶所草子坪長官司與貴州銅仁四川酉陽梅桐諸土司大牙相錯弘治中錯溪苗龍麻陽與銅仁苗龍童保聚衆攻剽土官李椿等實縱之而草子百夫長龍真與通謀後遂四出劫掠遠近騷然先後守臣莫能制丙將討之賊入連山深箐爲拒守計丙率師破其數寨賊走據天生崖及六龍山貴州巡撫沈林兵繼至連攻破之前後擒童保等二百人斬首八百九十餘級都指揮潘勛又破鎮草諸寨擒賊陽等

百六十人斬首級如前餘賊遠遁壘書興廟丙午
介敢任事所至嚴明法令修舉遷工部右侍郎採木入
山越二載犯風痺得疾卒詔贈尚書諡恭襄
贊曰英景間瓦剌逼西陲邊圉孔棘而黃蕭養葉宗留
之徒劫掠嶺南浙閩境上其後荆襄流民孺聚則以劉
通石龍爲之魁他若都勻松茂黔楚諸苗徭叛者數起
羅亨信侯璉諸人保固封圻誅虜禦亂討則有功撫則
信著宣力封疆無忝厥任矣孔鑄以知府服叛徭其才
力有過人者韓愈言柳中丞行事適機宜風采可畏愛
不如是惡能以有爲哉

明史卷一百七十二終

明史卷一百七十三 列傳第六十一

總裁官總纂務 經筵講官保兼李太保保和殿大學士兼實都部尚書事加六級張廷玉等奉

救修

楊洪 子俊

郭登 子能

孫鏜 趙勝

石亨 從子彪

朱謙 子承

范廣 孫暉等

楊洪字宗道六合人祖政明初以功為漢中百戶父璟戰死靈璧洪嗣職調開平善騎射遇敵輒身先突陣初從成祖北征至斡難河獲人馬而還帝曰將才也令識其名進千戶宣德四年命以精騎二百專巡徼塞上繼

命城西貓兒峪留兵戍之敗寇於紅山英宗立尚書王
驥言邊軍怯弱由訓練無人因言洪能詔加洪遊擊將
軍洪所部才五百詔選開平獨石騎兵益之再進都指
揮僉事時先朝宿將已盡洪後起以敢戰著名爲人機
變敏捷善出奇搗虛未嘗小挫雖爲偏校中朝大臣皆
知其能有毀之者輒爲曲護洪以是得展其才尚書魏
源督邊事指揮杜衡部卒李全皆訐奏洪罪帝從源言
謫衡廣西執全付洪自治尋命洪副都督僉事李謙守
赤城獨石謙老而怯故與洪左洪每調軍謙輒陰沮之
洪嘗勵將士殺敵謙笑曰敵可盡乎徒殺吾人耳御史

張鵬劾罷謙因命洪代洪益自奮朝廷亦厚待之每奏
捷功雖微必敘洪初敗兀良哈兵執其部長朶欒帖木
兒旣代謙任復敗其兵於西涼亭帝賜敕嘉獎又敕宣
大總兵官譚廣等曰此卽前寇延綏爲指揮王禎所敗
者去若軍甚適顧不能撲滅若視洪等媿不三年春擊
寇於伯顏山洪馬蹶傷足戰益力擒其部長也陵台等
四人追至寶昌州又擒阿台答刺花等五人寇大敗遁
去璽書慰勞遣醫視進都指揮同知賜銀幣尋以譚廣
老命充右叅將佐之洪建議加築開平城拓龍門所自
獨石至潮河川增置墩臺六十尋進都指揮使與兀良

哈兵戰三岔口又嘗追寇至亦把禿河再遷都督同知九年兀良哈寇延綏洪與內臣韓政等出大同至黑山迤北邀破之克列蘇進左都督軍士蒙賞者九千九百餘人洪嘗請給旗牌不許乃自製小羽箭木牌令軍中有司論其專擅帝不問十二年充總兵官代郭玘鎮宣府自宣德以來迤北未嘗大舉入寇惟朵顏三衛衆乘間擾邊多不過百騎或數十騎他將率巽悞洪獨以敢戰至大將諸部亦憚之稱爲楊王瓦刺可汗脫脫不花太師也先皆嘗致書於洪並遺之馬洪聞於朝敕令受之而報以禮嗣後數有贈遺帝方倚任洪不責也帝旣

北狩道宣府也先傳帝命趣開門城上人對曰所守者主上城池天已暮門不敢開且洪已他往也先乃擁帝去景帝監國論前後功封昌平伯也先復令帝爲書遺洪洪封上之時景帝已卽位馳使報洪上皇書爲也先今雖真書毋受於是洪一意堅守也先逼京師急詔洪將兵二萬入衛比至寇已退敕洪與孫鏗范廣等追擊餘寇至霸州破之獲阿歸等四十八人還所掠人畜萬計及關寇返鬪殺官軍數百人洪子俊幾爲所及寇去以功進侯命率所部留京師督京營訓練兼掌左府事朝廷以洪宿將所言多采納嘗陳禦寇三策又奏請簡

汰三千諸營將校不得以貧弱充伍皆從之景泰元年
于謙以邊警未息宜令洪等條上方略洪言四事命兵
部議行都督宮聚王喜張斌先坐罪繫獄洪與石亨薦
三人習戰請釋令立功詔已許而言官劾其黨邪撓政
帝以國家多事務得人置不問上皇還洪與石亨俱授
奉天翊衛宣力武臣于世券明年夏佩鎮朔大將軍印
還鎮宣府從子能信充左右叅將其子俊爲右都督管
三千營洪自以一門父子官極品手握重兵盛滿難居
乞休致請調俊等他鎮帝不許八月以疾召還京踰月
卒贈穎國公諡武襄妻葛氏自經以殉詔贈淑人洪久

居宣府御兵嚴肅士馬精強爲一時邊將冠然未嘗專
殺又頗好文學嘗請建學宣府教諸將子弟子傑嗣上
言臣家一侯三都督蒼頭得官者十六人大懼不足報
稱乞停蒼頭楊釗等職詔許之仍令給俸傑卒無子庶
兄俊嗣俊初以舍人從軍正統中累官署都指揮僉事
總督獨石永寧諸處邊務景帝卽位給事中金達奉使
獨石劾俊貪侈乃召還也先犯京師俊敗其別部於居
庸進都督僉事尋充右叅將佐朱謙鎮宣府太監喜寧
數誘敵入寇中朝患之購擒斬寧者賞黃金千兩白金
二萬兩爵封侯寧爲都指揮江福所獲而後冒其功廷

臣請如詔帝以俊邊將職所當爲不允加右都督賜金幣俊恃父勢橫恣嘗以私憾杖都指揮陶忠至死洪懼奏俊輕躁恐悞邊事乞令來京隨臣操練許之既至言官交劾下獄論斬詔令隨洪立功未幾冒擒喜寧功事覺詔追奪冒陞官軍別賞福等而降俊官令勦賊自劾俄充遊擊將軍巡徼真保涿易諸城還督三千營訓練景泰三年俊上疏曰也先旣弑其主併其衆包藏禍心窺伺邊境直須時動耳聞其妻孥輜重去宣府纔數百里我緣邊宿兵不下數十萬宜分爲奇正以待誘使來攻正兵列營大同宣府堅壁觀變而出奇兵倍道搗其巢彼必還自救我軍夾攻可以得志疏下廷議于謙等以計非萬全遂寢團營初設命俊分督四營明年復充遊擊將軍送瓦剌使歸至永寧被酒杖都指揮姚貴八十且欲斬之諸將力解而止貴訴於朝宣府叅政葉盛亦論俊罪以俊嘗潰於獨石斥爲敗軍之將俊上疏自理封還所賜敕書以明已功言官劾其跋扈論斬錮之獄會傑卒傑母魏氏請暫釋俊營傑葬事乃宥死降都督僉事旋襲洪職家人告俊盜軍儲再論死輸贖還爵久之又以陰事告俊免死奪爵命其子珍襲俊初守永寧讓來聞也先欲奉上皇還密戒將士毋輕納旣還又

言是將爲禍本及上皇復位張軌與俊不協言於朝遂
徵下詔獄坐誅奪珍爵戍廣西憲宗立授龍虎衛指揮
使能字文敬沈毅善騎射從洪屢立功爲開平衛指揮
使進都指揮僉事景泰元年進同知充遊擊將軍沿邊
巡徼寇犯蔚州畏不進復與紀廣禦寇野狐嶺敗傷右
膝爲御史張昊所劾宥之尋命與石彪各統精兵三千
訓練備調遣再加都督僉事累進左副總兵協守宣府
巡撫李秉劾其貪情弗問五年召還總神機營天順初
以左都督爲宣府總兵官與石彪破寇磨兒山封武強
伯也先已死孛來繼興能欲約兀良哈其襲劫之與以

信礮兵部劾其非計帝以能志在滅賊置不罪寇犯宣
府能失利復爲兵部所劾帝亦宥之是年卒無子弟倫
襲羽林指揮使信字文實幼從洪擊敵興州賊將方躍
馬出陣前信直前擒之以是知名累功至指揮僉事正
統末進都指揮僉事守柴溝堡也先犯京師入衛進都
指揮同知景泰改元守懷來寇入不能禦護餉永寧聞
礮聲奔還皆被劾朝議以方用兵不問累進都督僉事
代能爲左副總兵協鎮宣府上言鹿角之制臨陣可捍
敵馬結營可衛士卒每隊宜置十具遇敵團牌拒前鹿
角列後神銃弓矢相繼迭發則守無不固戰無不克從

明史卷一百三十三 列傳 六
之天順初移鎮延綏進都督同知明年破寇青陽溝大
獲封彰武伯佩副將軍印充總兵官鎮守如故延綏設
總兵官佩印自信始也頃之破寇高家堡三年與石彪
大破寇於野馬澗明年寇二萬騎入榆林信擊却之追
奔至金鷄峪斬平章阿孫帖木兒還所掠人畜萬計其
冬代李文鎮大同憲宗卽位信自陳前後戰功予世券
成化元年冬禦寇延綏無功召還督三千營毛里孩據
河套命佩將軍印總諸鎮兵往禦寇旣渡河北去已復
還據套分掠水泉營及朔州信等屢却之寇遂東入大
同因詔信還鎮大同六年信與副將徐恕叅將張瑛分

道出塞敗寇於胡柴溝獲馬五百餘匹璽書獎勵信在
邊三十年鎮以安靜人樂爲用然性好營利代王嘗奏
其違法事詔停一歲祿十三年冬卒於鎮贈侯諡武毅
洪父子兄弟皆佩將印一門三侯伯其時稱名將者推
楊氏昌平侯旣廢能以流爵弗世而信獨傳其子瑾弘
治初領將軍宿衛三傳至曾孫炳隆慶時協守南京召
掌京營戎政屢加少師卒諡恭襄傳子至孫崇猷李自
成陷京師被殺

石亨渭南人生有異狀方面偉軀美髯及膝其從子彪
魁梧似之鬚亦過腹就飲酒肆相者曰今平世二人何

乃有封侯相亨嗣世父職爲寬河衛指揮僉事善騎射能用大刀每戰輒摧破正統初以獲首功累遷都指揮僉事敗敵黃牛坡獲馬甚衆三年正月敵三百餘騎飲馬黃河亨追擊至官山下多所斬獲進都指揮同知尋充左叅將佐武進伯朱冕守大同六年上言邊餉難繼請分大同左右玉林雲川四衛軍墾淨水坪迤西曠土官給牛種可歲增糧萬八千石明年又言大同西路屯堡皆臨極邊玉林故城去右衛五十里與東勝單于城接水草便利請分軍築壘防護屯種詔皆允行尋以敗敵紅城功進都指揮使敵犯延安追至金山敗之再遷

都督僉事亨以國制搜將才未廣請倣漢唐制設軍謀宏遠智識絕倫等科令人得自陳試驗擢用不專保舉報可十四年與都督僉事馬麟巡徼塞外至箭豁山敗兀良哈衆進都督同知是時邊將智勇者推楊洪其次則亨亨雖偏將中朝倚之如大帥故亨亦盡力其秋也先大舉寇大同亨及西寧侯宋瑛武進伯朱冕等戰陽和口瑛冕戰沒亨單騎奔還降官募兵自劾郕王監國尚書于謙薦之召掌五軍大營進右都督無何封武清伯也先逼京師命偕都督陶瑾等九將分兵營九門外德勝門當敵衝特以命亨于謙以尚書督軍寇薄彰義

門都督高禮等却之轉至德勝門外亨用謙令伏兵誘擊死者甚衆旣而圍孫鏜西直門外以亨救引卻相持五日寇斂衆遁論功亨爲多進侯景泰元年二月命佩鎮朔大將軍印帥京軍三萬人巡哨大同遇寇敗之其秋子世襲誥券易儲加亨太子太師于謙立團營命亨提督充總兵官如故八年帝將郊宿齋宮疾作不能行禮召亨代亨受命榻前見帝病甚遂與張軌曹吉祥等謀迎立上皇上皇旣復辟以亨首功進爵忠國公眷顧特異言無不從其弟姪家人冒功錦衣者五十餘人部曲親故竄名奪門籍得官者四千餘人兩京大臣斥逐

殆盡納私人重賄引用太僕丞孫弘郎中陳汝言蕭聰張用瀚郝璜龍文朱銓員外郎劉本道爲侍郎時有語曰朱三千龍八百勢焰熏灼嗜進者競走其門旣以私憾殺于謙范廣等又以給事中成章御史甘澤等九人嘗攻其失貶黜之數與大獄構陷耿九疇岳正而成楊瑄張鵬謫周斌盛頤等又惡文臣爲巡撫抑武臣不得肆盡撤還由是大權悉歸亨亨無日不進見數預政事所請或不從艱然見於辭色卽不召必假事以入出則張大其勢市權利久之帝不能堪嘗以語閣臣李賢賢曰惟獨斷乃可帝然之一日語賢曰閣臣有事須燕見

彼武臣何故頻見遂敕左順門非宜召毋得納總兵官
亨自此稀燕見亨嘗白帝立碑於其祖墓工部希亨指
請敕有司建立翰林院撰文帝以永樂以來無爲功臣
祖宗立碑故事責部臣而令亨自立初帝命所司爲亨
營第旣成壯麗踰制帝登翔鳳樓見之問誰所居恭順
侯吳瑾謬對曰此必王府帝曰非也瑾曰非王府誰敢
僭踰若此帝頷之亨旣繼作人主而從子彪亦封定遠
侯驕橫如亨兩家蓄材官猛士數萬中外將帥半出其
門都人側目三年秋彪謀鎮大同令千戶楊斌等奏保
帝覺其詐收斌等拷問得實震怒下彪詔獄亨懼請罪

帝慰諭之亨請盡削弟姪官放歸田里帝亦不許及鞫
彪得繡蟒龍衣及違式床諸不法事罪當死遂籍彪
家命亨養病亨嘗遣京衛指揮裴瑄出關市木遣大同
指揮盧昭追捕亡者至是事覺法司請罪亨帝猶置不
問法司再鞫彪言彪初爲大同遊擊以代王增祿爲已
功王至跪謝自是數款彪出歌妓行酒彪凌侮親王罪
亦嘗死因劾亨招權納賕肆行無忌與術士鄒叔彝等
私講天文妄談休咎宜置重典帝命錮彪於獄亨閒住
罷朝叅時方議革奪門功竊治亨黨由亨得官者悉黜
朝署一清明年五月錦衣指揮遂杲奏亨怨望與其從

孫後等造妖言蓄養無賴專伺朝廷動靜不軌迹已著
廷臣皆言不可輕宥乃下亨獄坐謀叛律斬沒其家
貲踰月亨瘐死彪後竝伏誅彪驍勇敢戰善用斧初以
舍人從軍正統末積功至指揮僉事景泰改元詔予
追襲餘寇頗有斬獲進署都指揮僉事景泰改元詔予
實授充遊擊將軍守備威遠衛敵圍土城彪用礮擊死
百餘人遁去塞上日用兵彪勇冠流輩每戰必捷以故
一歲中數遷至都督僉事恃亨勢多縱家人占民產又
招納流亡五十餘戶擅越關置莊墾田爲給事中李侃
御史張奎所劾請並罪亨景帝皆宥不問但令給還民

產遣流亡戶復業而已三年冬充叅將協守大同嘗
憾巡撫年富抑已不得逞及英宗復辟召彪還亨方得
志彪遂誣奏富罪致之獄未幾進都督同知再以遊擊
將軍赴大同備敵與叅將張鵬等哨磨兒山寇千餘騎
來襲彪率壯士衝擊斬把禿王寨其旗俘斬百二十人
追至三山墩又斬七十二人以是封定遠伯遊擊如故
天順二年命偕高陽伯李文赴延綏禦寇以疾召還尋
充總兵官明年寇二萬騎入掠安邊營彪與彰武伯楊
信等禦之連戰皆捷斬鬼力赤追出塞轉戰六十餘里
生擒四十餘人斬首五百餘級獲馬駝牛羊二萬餘爲

西北戰功第一捷聞進侯彪本以戰功起家不藉父兄
廕然一門二公侯勢盛而驕多行不義謀鎮大同與亨
表裏握兵柄爲帝所疑遂及於禍後天順元年進士助
亨籌畫都督杜清出亨門下後造妖言有土木掌兵權
語蓋言杜也事覺後伏誅清亦流金齒

郭登字元登武定侯英孫也幼英敏及長博聞強記善
議論好談兵洪熙時授勳補正統中從王驥征麓川有
功擢錦衣衛指揮僉事又從沐斌征騰衝遷署都指揮
僉事十四年車駕北征扈從至大同超拜都督僉事充
叅將佐總兵官廣寧伯劉安鎮守朱勇等軍覆倉猝議

旋師登告學士曹鼐張益曰車駕宜入紫荆關王振不
從遂及於敗當是時大同軍士多戰死城門盡閉人心
洶洶登慷慨奮勵修城堞繕兵械拊循士卒弔死問傷
親爲裹創傳藥曰吾誓與此城共存亡不令諸君獨死
也八月也先擁帝北去經大同使袁彬入城索金幣登
閉城門以飛橋取彬入登與安及侍郎沈固給事中孫
祥知府霍瑄等出謁伏地慟哭以金二萬餘及宋瑛朱
冕內臣郭敬家資進帝以賜也先等是夕敵營城西登
謀遣壯士劫營迎駕不果明日也先擁帝去景帝監國
進都督同知充副總兵尋令代安爲總兵官十月也先

犯京師登將率所部入援先馳蠟書奏至敵已退景
帝優詔褒答進右都督登計京兵新集不可輕用上用
兵方略十餘事景泰元年春偵知寇騎數千自順聖川
入營沙窩登率兵躡之大破其衆追至栲栳山斬二百
餘級得所掠人畜八百有奇邊將自土木敗後畏縮無
敢與寇戰登以八百人破敵數千騎軍氣爲之一振捷
聞封定襄伯予世券四月寇騎數千奄至登出東門戰
佯北誘之入土城伏起敵敗走登度敵且復至令軍士
齎毒酒羊豕楮錢僞爲祭家者見寇卽棄走寇至爭飲
食之死者甚衆六月也先復以二千騎入寇登再擊却

之越數日奉上皇至城外聲言送駕還登與同守者設
計具朝服候駕月城內伏兵城上俟上皇入卽下月城
闌也先及門而覺遂擁上皇去時鎮守中官陳公忌登
會有發公奸贓者公疑登使之遂與登構帝謂于謙曰
大同吾藩籬也公與登如其何以守遣右監丞馬慶
代公還登愈感奮初也先欲取大同爲巢穴故數來攻
及每至輒敗有一營數十人不還者敵氣懾始有還上
皇意上皇旣還代王仕壘頌登功乞降敕獎勞兵部言
登已封伯乃止二年登以老疾乞休舉石彪自代且請
令其子嵩宿衛帝以嵩爲散騎舍人不聽登辭是時邊

患甫息登悉心措置思得公廉有爲者與俱遂劾奏沈
固廢事而薦尚書楊寧布政使年富又言大同既有御
史又有巡按御史僉都御史任寧宜止巡撫宣府帝悉
從之以年富代固而徵還固及寧其秋以疾召還登初
至大同士卒可戰者纔數百馬百餘匹及是馬至萬五
千精卒數萬屹然成巨鎮登去大同人思之初英宗過
大同遣人謂登曰朕與登有姻何拒朕若是登奏曰臣
奉命守城不知其他英宗銜之及復辟登懼不免首陳
八事多迎合尋命掌南京中府事明年召還言官劾登
結陳汝言獲召鞫實論斬宥死降都督僉事立功甘肅

憲宗卽位詔復伯爵充甘肅總兵官奏邊軍饋馬艱甚
至鬻妻子乞借楚慶肅三王府馬各千匹官酬其直從
之用朱永等薦召掌中府事總神機營兵成化四年復
設十二團營命登偕朱永提督八年卒贈侯諡忠武登
儀觀甚偉髯垂過腹爲將兼智勇紀律嚴明料敵制勝
動合機宜嘗以意造攪地龍飛天網鑿深塹覆以土木
如平地敵入圍中發其機自相撞擊頃刻皆陷又倣古
製造偏箱車四輪車中藏火器上建旗幟鉤環聯絡布
列成陣戰守皆可用其軍以五人爲伍教之盟於神祠
一人有功五人同賞罰亦如之十五爲隊隊以能挽六

十斤弓者爲先鋒十隊領以一都指揮令功無相撓罪
有專責一時稱善登事母孝居喪秉禮能詩明世武臣
無及者無子以兄子嵩爲子登謫甘肅留家京師嵩窘
其衣食登妾縫紉自給幾殆弗顧登還欲黜之以其壻
於會昌侯侯嘗活已隱忍不發及卒嵩遂襲爵後以非
登嫡嗣止嵩身子參降錦衣衛指揮使

朱謙夏邑人永樂初襲父職爲中都留守左衛指揮僉
事洪熙時隸陽武侯薛祿征北有功進指揮使宣德元
年進萬全都指揮僉事正統六年與參將王真巡哨至
伯顏山遇寇擊走之次閔安山遇兀良哈三百騎又敗

之追至秦來泉寇越山澗遁去乃還時謙已遷都指揮
同知乃以爲都指揮使八年充右叅將守備萬全左衛
明年與楊洪破兀良哈兵於克列蘇進都督僉事所部
發其不法事帝以方防秋宥之復以北征功進都督同
知帝北狩也先擁至宣府城下令開門謙與叅將紀廣
都御史羅亨信不應遂去進右都督與楊洪入衛會寇
已退迫襲之近畿戰失利洪劾之兵部竝劾洪不救景
帝俱弗問洪入總京營廷議欲得如洪者代之僉舉謙
乃進左都督充總兵官鎮守宣府景泰元年四月寇三
百騎入石烽口復由故道去降敕切責踰月復入犯謙

率兵禦之次關子口寇數千騎突至謙拒以鹿角發火
器擊之寇少却如是數四謙軍且退寇復來追都督江
福援之亦失利謙卒力戰寇不得入六月復有二千騎
南侵謙遣都指揮牛璽等往禦戰南坡謙見塵起率參
將紀廣等馳援自己至午寇敗遁諭功封撫寧伯是時
寇氣甚驕屢擾宣府大同意二城且旦夕下而謙守宣
府郭登守大同數挫其衆也先知二人難犯始一意歸
上皇八月上皇還道宣府謙率子承出見厚犒其使者
旣而謙謬報寇五千騎毀牆入察之則也先貢使也詔
切責之謙惶恐謝明年二月卒於鎮贈侯子承襲謙在

邊久善戰然勇而寡謀故其名不若楊洪石亨郭登之
著成化中謚武襄承字景昌偉軀貌顧盼有威初見上
皇於宣府數日屬焉景泰中嗣爵奉朝請英宗復辟睹
承識之曰是見朕宣府者耶承頓首謝即日召侍左右
分領宣威營禁軍天順四年宣大告警命帥京軍巡邊
七年統三千營尋兼神機營憲宗立改督撫營領三千
營如故成化元年荆襄盜劉通作亂命承與尚書白圭
往討進師南漳擊斬九百有奇會疾留南漳而圭率大
軍破賊承往會道遇餘賊俘斬數百人其秋復進討石
龍馮喜皆捷論功進侯毛里孩犯邊命佩將軍印會彰

武伯楊信禦之會遣使朝貢乃班師六年阿羅出寇延
綏復拜將軍偕都御史王越都督劉玉劉聚往討擊敗
之蘇家寨寇萬騎自雙山堡分五道至戰於開荒川寇
少却乘勢馳之皆棄輜重走至牛家寨遇都指揮吳瓚
兵少寇圍之指揮李鎬滕忠至復力戰聚及都指揮范
瑾神英分據南山夾擊寇乃大敗斬首一百有六獲馬
牛數千阿羅出中流矢遁時斬獲無多然諸將咸力戰
追敵邊人以爲數十年所未有論功予世侯阿羅出雖
少挫猶據河套明年正月寇屢入永所部屢有斬獲三
月復以萬餘騎分掠懷遠諸堡永與越等分兵爲五設

緝賊之追至山口及混忽都河寇敗走而遊擊孫鉞蔡
蘆別破他部於鹿塞山捷聞璽書獎勞永等再請班師
者不許寇復以二萬餘騎入掠擊退之歲將盡乃召永
還留越總制三邊十四年加永太子太保明年冬拜靖
虜將軍東伐以中官汪直監督軍務還進爵保國公又
明年正月延綏告警命永爲將軍越提督軍務直仍監
督分道出塞越與直選輕騎出孤店關俘寇於威寧海
子而永率大軍由西路出榆林不見寇道回遠費兵食
巨萬馬死者五千餘匹於是越得封伯直廢錫踰等而
永無功賞不行久之進太子太傅十七年二月復偕直

越出師大同禦亦思馬獲首功百二十遂賜襲世公十
九年秋小王子入邊宣大告急越與直已得罪以永爲
鎮朔大將軍中官蔡新監其軍督諸將周玉李璵等擊
敗之還仍督團營或投匿名書言永圖不軌永乞解兵
柄不許其冬手敕加太傅太子太師弘治四年監修太
廟成進太師永治軍嚴肅所至多奏功前後八佩將軍
印內總十二團營兼掌都督府列侯勳名無與比九年
卒追封宣平王諡武毅子暉嗣給事中王廷言永功不
當公朝議止予襲一世後皆侯詔可暉字東陽長身美
髯人稱其威重類父又屢從父塞下歷行陣時以爲才

弘治五年授勳衛年垂五十始嗣爵分典神機營十三
年更置京營大帥命暉督三千營兼領右府事火篩入
大同平江伯陳銳等不能禦命暉佩大將軍印代之比
至寇已退乃還明年春火篩連小王子大入延綏寧夏
右都御史史琳請濟師復命暉佩大將軍印統都督李
俊李澄楊玉馬儀劉寧五將往而以中官苗達監其軍
至寧夏寇已飽掠去乃與琳達率五路師搗其巢於河
套寇已徙帳僅斬首三級獲馬駝牛羊千五百以歸未
幾寇入固原轉掠平涼慶陽關中大震兩鎮將嬰城不
敢戰而暉等畏怯不急赴比至斬首十二人還所掠生

口四千遂以捷聞是役也大帥非制勝才師行紆迴無
紀律邊民死者徧塗諸郡困轉輸餉軍費八十餘萬他
徵發稱是先後僅獲首功十五級廷臣連章劾三人罪
帝不問已而上搗巢有功將士萬餘人尚書馬文升大
學士劉健持之帝先入達等言竟錄二百十人署職一
級餘皆被賚及班師帝猶遣中官齎羊酒迎勞言官極
論暉罪終不聽以暉總督團營領三千營右府如故武
宗卽位寇大入宣府復命暉偕達琳帥師往寇轉掠大
同叅將陳雄擊斬八十餘級還所掠人口二千七百有
奇暉等奏捷列有功將士二萬餘人兵部侍郎閻仲宇

大理丞鄧璋往勘所報多不實終以達故衆咸給賜劉
瑾用事暉等更奏錄功太薄請依成化間白狐莊例兵
部力爭不納竟從暉言得擢者千五百六十三人暉加
太保正德六年卒子麒麟襲侯嘗充總兵官鎮兩廣與姚
鎮平田州誅岑猛加太子太保嘉靖初召還久之守備
南京卒子岳嗣亦守備南京隆慶中卒四傳至孫國弼
天啓中楊漣劾魏忠賢國弼亦乞速賜處分忠賢怒停
其歲祿崇禎時總督京營溫體仁柄國國弼抗疏劾之
詔捕其門客及繕疏者下獄停祿如初及至南京進保
國公乃與馬士英阮大鍼相結以訖明亡

孫鏜字振遠東勝州人襲濟陽衛指揮同知用朱勇薦
進署指揮使正統末擢指揮僉事充左叅將從總兵官
徐恭討葉宗留敗賊金華復破之烏龍嶺英宗北狩景
帝召鏜還超擢都督僉事典三千營也先將人犯進右
都督充總兵官統京軍一萬禦之紫荆關將發寇已入
遂營都城外寇薄德勝門爲于謙等所卻轉至西直門
鏜與大戰斬其前鋒數人寇稍北鏜逐之寇益兵圍鏜
鏜力戰不解高禮毛福壽來援禮中流矢會石亨兵至
寇乃退詔鏜副楊洪追之戰於涿州深溝頗有斬獲師
還仍典營務景泰初楊洪劾鏜下獄石亨請赦鏜江淵

亦言城下之役惟鏜戰最力乃釋之三年冬充副總兵
協郭登鎮大同登節制嚴鏜不得逞欲與分軍且令子
百戶宏侮登帝械宏竟以鏜故賞之召還典三千營如
故英宗復辟以奪門功封懷寧伯尋子世券天順初甘
肅告警詔鏜充總兵官帥京軍往討將陞辭病宿朝房
夜二鼓太監曹吉祥昭武伯曹欽反其部下都指揮馬
亮告變於恭順侯吳瑾瑾趨語鏜鏜草奏叩東長安門
自門隙投入內廷始得集兵縛吉祥守皇城諸門鏜走
太平侯張瑾家邀兵擊賊瑾不敢出鏜倉猝復走宣武
街急遣二子輔軌呼征西將士給之曰刑部囚反獄獲

者重賞衆稍聚至二千人始語之故時已黎明遂擊欽
欽方攻東長安門不得入轉攻東安門鏜兵追及賊稍
散軌斫欽中膊軌亦被殺欽知事不成竄歸其家猶督
衆拒鏜力戰至晡始定論功第一進爵世侯仍典三千
營贈軌百戶世襲鏜廕猛善戰然數犯法初賄太監金
英得遷都督事覺論斬景帝特宥之天順末以受將士
賄屢被劾不自安求退詔解營務及府軍前衛事猶掌
左府憲宗卽位中官牛玉得罪鏜坐與玉婚停祿閒住
尋陳情予半祿已復自陳功狀給祿如故成化七年卒
贈涑國公諡武敏子輔請嗣吏部言奪門功例不得世

傳帝以鏜捕反者予之傳子至孫應爵正德中總督團
營四傳至曾孫世忠萬曆中鎮守湖廣總督漕運凡二
十年又三傳至孫維藩流賊陷京師被殺鏜之言奪門
功封伯爵也都督董興及曹義施聚趙勝等皆乘是時
冒封予世券興義聚自有傳趙勝字克功遷安人襲職
爲永平衛指揮使正統末禦寇西直門進都指揮僉事
天順初與孫鏜等預奪門功超遷都督僉事又與鏜擊
反者曹欽進同知李來犯甘肅勝與李景充左右叅將
從白圭西征至固原擊寇却之憲宗立與鼓勇營訓練
成化改元山西告警拜將軍次雁門寇已退乃還明年

復出延綏禦寇會方納款遂旋師尋典擢武營四年充
總兵官鎮遼東七年召典五軍營已改三千營亂加思
蘭犯宣府詔勝爲將軍統京兵萬人禦之亦以寇遁召
還久之進左都督加太子太保十九年封昌寧伯勝初
與李杲竝有名後屢督大師未見敵無功資緣得封名
大損後加太保營萬貴妃瑩墮崖石間死贈侯諡壯敏
弘治初孫鑑乞襲爵吏部言勝無功不當傳世乃授錦
衣衛指揮使

范廣遼東人正統中嗣世職爲寧遠衛指揮僉事進指
揮使十四年積功遷遼東都指揮僉事廣精騎射驍勇
絕倫英宗北狩廷議舉將材尚書于謙薦廣擢都督僉
事充左副總兵爲石亨副也先犯京師廣躍馬陷陣部
下從之勇氣百倍寇退又追敗之紫荆關錄功命實授
俄進都督同知出守懷來尋召還景泰元年二月亨出
巡邊時都督衛穎統大營命廣協理三月寇犯宣府敕
兵部會諸營將遴選將材僉舉廣命充總兵官偕都御
史羅通督兵巡哨駐居庸關外數月還京副石亨提督
圍營軍馬亨所爲不法其部曲多貪縱廣數以爲言亨
銜之譖罷廣止領毅勇一營廣又與都督張軌不相能
及英宗復辟亨軌恃奪門功誣廣黨附于謙謀立外藩

明史卷一百七十三 列傳 三十三
遂下獄論死子昇戍廣西籍其家以妻孥第宅賜降丁
明年春軌早朝還途中為拱揖狀左右怪問之曰范廣
過也遂得疾不能睡痛楚月餘而死成化初廷臣訟廣
寃命子昇仍襲世職廣性剛果每臨陣身先士卒未嘗
敗衄一時諸將盡出其下最為于謙所信任以故為儕
輩所忌

贊曰楊洪石亨輩遭時多事奮爪牙之力侯封世券照
耀一門酬庸亦過厚矣洪知盛滿可懼而亨邪狠粗傲
怙寵而驕其赤族宜哉朱謙勇略不及郭登登乃無後
而謙子永進爵上公子孫世侯勿絕孫鏗范廣善戰略
相等而廣以寃死所遇有幸有不幸相去豈不遠哉

明史卷一百七十三終

